

江西通志卷第七十五

人物十

吉安府一

漢

歐寶永豐人性至孝父喪廬於墓里人格虎虎投廬中寶以衣覆之里人問寶寶曰虎可舍藏乎虎得免每月致鹿以

助祭 林志

按歐寶林志以為漢人白志仍之安志以為南北朝人考宋史至和元年始析吉水置永豐縣前此未有永豐名舊志俱誤明一統志載安成人安成漢縣似可從今姑仍舊志又吉州人文紀作歐陽寶不知何據

晉



江西南通志 卷之十五
修肅廬陵人爲典書令懷帝始立爲皇太弟懼不自安肅曰
二相經營王志寧社稷儲貳之重宜歸時望親賢之舉
非大王而誰清河幼弱未允衆心今乘輿播越二宮久曠
宜及時登儲副帝曰卿吾宋昌也從之晉書懷帝本紀後
苻表太元中隨父徙安成年十六母姜氏有疾晝夜省視母
一食表亦一食母不食將絕表感咽而殞俄母亦沒葬於
四望岡太守爲表其墓豫章書

按林志安志晉苻表不載何時人明一統志有大中間
三字東晉無大中年號郭青螺謂當從舊府志作太元
考舊府志無太元字又林志以表爲朗兄苻字從竹一
統志郭書俱以爲朗兄子皆不知何據考晉書苻朗附
見堅傳後初不及表事白志據郭書采入姑仍之又寰

宇記謂表其墓者王府君樹雙玉闕云

宋

王孚安成人文帝時爲文學主簿未幾卒沈邵誄之以文稱
其行潔業淳去華息競志學修道老而彌篤云林志

南齊

王虛之字文靜廬江石陽人十三喪母三十三喪父二十五
年鹽酢不入口庭中楊梅樹隆冬三實每夜所居有光如
燭墓上橘樹一冬再實時咸以爲孝感所致南史

按隋書地理志廬江無石陽而晉志石陽屬廬陵則江
字當是陵字之訛再攷宗躬孝子傳及豫章書又以虛
之爲廬陵西昌人與史傳異白志從史訂正

匡昕字令先廬陵人有至性隱居金華山服食不與俗人交

江西通志 卷之十五
母病亡已經日昕奔還號叫母即蘇皆以為孝感所致南史解叔謙傳後

隋

李孝子失其名吉水人幼喪母哀毀踰禮事父孝養惟謹父沒未及葬比舍失火火驟至慟哭伏棺死其墓在學宮側有司世世表封之林志

按周叙孝子亭記言其事父每出逾里輒返曰吾可暫忘膝下乎父病十旬衣不解帶云

王鶩石陽人父喪權殯宅後宅火力不能救遂投火死鄉人哀其孝共立墓葬之因祠祀焉白志

按石陽屬廬陵豫章書謂泰和孝子自鶩始不審所據明一統志不載安志入南朝邑志入南齊今從白志

唐

羅祿龍泉人為駕部郎中從李德裕平澤潞上疏論河朔諸藩倔強闡寺弄權數事命與令狐綯同議累官至尚書吏部侍郎參知政事階銀青光祿大夫林志

按唐書志吉州廬陵郡無龍泉縣名考寰宇記南唐保大元年析太和龍泉鄉什善鎮地置龍泉場宋顯德七年升為縣林志以祿為龍泉人者誤祿當書太和人

陳岳廬陵人為南昌觀察判官著唐書自高祖至穆宗為統紀凡一百卷行于世子睿仕吳為翰林學士撰吳錄二十卷安志

按白志謂陳岳父子豫章書凡兩載一以為龍泉人一以為峽江人今刪彼存此然白志所引豫章書岳傳又

作廬陵王笥人考唐時無龍泉峽江縣名郭書疑誤今改從安志

江檀永新人天祐間刺史靖難于南昌縣象牙潭江上後人為建廟祀之 白志

賀泰前縣令馮子黃巢之亂泰將兵扞金陵賊自關陝乘勝

南下浙江將入廣泰反趨洪州邀擊之大戰象牙潭挺身對陣賊不敢逼後以饒信諸州縣並陷遂力竭斃於軍洪

人憫之封墓江口廟祀焉詔贈武翼大夫 永新縣志

按江賀死地相同安志府志唐末人物俱有江無賀白志于江檀存疑仍不錄賀泰今並采俟考

彭玕本瀛州人四世祖雲構天寶中遷居廬陵唐末玕雄據一方士馬精銳數與淮南爭衡湖南馬楚為之請於後唐

封安定王享年九十八繼學不衰子弟從授二戴禮及春秋者俱千餘人 歐陽圭齋集

按彭玕林志人物志俱不載白志據圭齋集中彭氏譜序采補

南唐

周彬和川人杜門讀書不治產業聞烈祖鎮金陵招辟儒生

彬因獻所習烈祖善之禪代之後有事南郊彬著郊望論數千言陳前古得失上之署諸衛巡官授大理司直出宰

和川為政廉平鄉里率化秩滿邑人詣郡乞留連任七考 馬令南唐書

按白志引寰宇記謂唐顯慶四年永新民以泰和道遠請別置縣于和山和川之名當在此時南唐仍而不改

故彬爲和川人即今泰和縣也考唐書地理志武德五年置南平州并永新廣興東昌三縣八年州廢省永新等縣入太和顯慶二年復析太和置永新永新別爲縣不應仍屬太和至四年又以道遠請別置縣也且唐志并無和川縣名俟再考又安志云彬宰本邑時有爭訟者以理和解嗣主錫以銀章茜綬寵異之官至尚書郎蕭儼廬陵人幼舉童子科稍長爲祕書省正字烈祖初歷大理司刑部郎中元宗保大二年欲傳位於景遂儼上書力爭其後元宗於宮中作大樓臺近臣入觀皆歎其宏麗儼獨曰比景陽但少一井耳貶舒州副使俄召還後主嗣位與嬖佞奕棋儼入見作色投局於地後主詰之曰汝欲效魏徵耶儼曰臣非魏徵則陛下亦非太宗矣後主爲罷奕

南唐亡以老病歸鄉卒年七十餘

同上

羅韜字洞晦廬陵人唐末隱居不仕南唐徵授長沙通判除端明殿學士不拜獻丹宸四箴禮賜金幣以歸愛匡山山水徙居之建書院于山麓事聞勅賜額匡山書院命翰林學士趙鳳爲扁題及卒門人私謚靜逸先生

玉山遺響

按羅韜各志俱不載白志采張箕山庸書所載羅洞晦先生傳補入是時學校之政未有修明共溺于詞章取具應制韜崛起以聖學爲己任有宋道學之盛蓋有開先之力焉

顏詡魯郡公真卿之後唐末徙居禾川少孤事繼母以孝聞一門百口家法嚴肅子姪二十餘人皆被服儒業聞子弟中有與客戲者手寫韋昭博奕論署于屋壁使之自媿家

人未見其喜愠卒年七十餘 馬令南唐書

按宋史弘簡錄易延慶傳後有顏詡吉州永新人其祖真卿謫廬陵因家焉詡應歸吉安人物前志入寓賢今更定又宋史謂乾德元年詡卒詔旌其門改鄉名義感里名和順以詡為宋人攷乾德時南唐國號尚存而詡已卒應從馬書入南唐

蕭結廬陵人為祁陽令潔已愛民志移澆俗時方暮春州符下取船競渡結批曰秧開五葉蠶長三眠人皆忙迫划甚閒船州守為罷競渡 明一統志

按蕭結舊志不載今采一統志湖廣名宦補入又湖廣志列入五代歐陽史職方考云自江以下二十一州屬南唐結應為南唐人

劉生廬陵人南唐時居闌闌中業釘鉸事母極孝母病目二十餘年生苦心求療一日為人磨銅餅得異方歸以藥母母目復明 安志

魯崇範廬陵人烈祖初建學典籍多闕崇範雖窶九經子史世藏於家刺史賈皓就取進之以已緡償其直崇範笑曰墳典天下公器世亂藏於家世治藏于國其實一也吾非書肆何估直以償耶皓謝曰俗吏浼濁以貽先生羞不然何以見高義會皓赴闕與俱至金陵表薦之授太子洗馬 馬令南唐書

按明一統志及豫章書魯作曾白志從史改定

蕭瓚字君玉泰和人性至孝仕南唐歷官國子祭酒過家上冢適度寇犯州境瓚率畦丁掩捕畧盡沒之日鄉人立祠

祀焉 林志

陳喬字子喬廬陵玉笥人起家太常奉禮郎歷中書舍人淮南兵興元宗憂蹙不知所為陳覺李徵古請以宋齊邱攝政召喬草詔喬排宮門入頓首曰陛下既署此則百官朝請皆歸齊邱他日求為田舍翁不可得矣元宗笑而止引喬入見后及諸子曰此忠臣也後主嗣位歷吏部門下侍郎兼光政院輔政宋太祖遣使召後主入朝喬曰往必見留如社稷何及曹彬下金陵城將陷後主自為降款命喬詣彬喬持款歸府投承雷中復入見云自古無不亡之國降亦無由得全徒取辱耳請背城一戰後主不能從喬曰如此則不如誅臣歸臣以拒命之罪又不從乃掣手而去至政事堂召二親吏解所服金帶與之曰善藏吾骨遂自

縊二吏撤榻瘞之金陵平家人謀改葬求尸不獲或見一丈夫衣黃半臂舉手障面及發瘞如所見焉 陸游南唐書

按喬為廬陵人陸馬二書同宋史張洎傳附載陳喬事不言何許人人物志則南昌吉安臨江三府互載喬父名睿又訛作濬失於考證遂多複舛白志據史改定

郭昭慶廬陵人博學能自力嘗著唐春秋三十卷保大中獻所作治書補揚子尉後主時復獻經國治民論擢著作郎時方奉中朝凡歲慶賀貢方物牋表及廷勞宴餞之辭率命昭慶為之 同上

按馬令書以昭慶為禾川人豫章書以為永新人今從陸書

劉洞廬陵人隱居廬山二十年能詩長於五字律自言得賈

江西通志 卷之十五
島法後主屬意詩文洞獻詩百篇不見省金陵受圍洞猶
在圍中國亡過故宮闕徘徊賦詩感慨悲傷不以不遇而
有怨懟語有夜坐詩見稱一時號劉夜坐云 同上
郭鵬永新人南唐開科取士鵬中第為廬陵令尋轉大理屬
官與大理卿蕭儼同決疑獄按南平王鍾傳夫人奸事又
服其果斷 永新人物志

按劉文安公永新人物志所載多本邑人間有林志豫
章書所不載者如郭胡二人是也

胡元龜永新人少有俊才嘗候邑宰宰欲窮其所學指屏間
戲珠龍求詩元龜援筆立就有云翻身騰白浪伸爪攫明
珠意以諷其貪也宰媿服後射策入官授文房別史 同上
歐陽彬永豐人仕南唐為武昌令檢校右散騎常侍兼御史

大夫性孝友鄉里稱之累贈中書令 林志

歐陽偃彬子少以文學稱南唐時獻所為文名試為南京街
院判官累贈中書兼尚書令 吳沖卿撰行狀

歐陽儀彬子中南唐進士第父母皆在鄉里榮之命其鄉曰
儒林里曰歐林坊曰具慶 同上

按彬即文忠公之曾祖生八男詳見吳沖卿充所撰行
狀中林志以彬為廬陵人據行狀則永豐人也偃儀二
人林志豫章書人物志俱不載白志采補

劉景洪永新人唐南陽太守遐之後家富好施楊行密攻江
西吉州刺史彭玕屬景洪以兵脅永新附湖南景洪偽許
之玕奔湖南景洪終以州歸行密及徐溫建國以禮聘景
洪辭不赴嘗曰吾免二國交兵活人多矣當有興隆者故

名其北山曰後隆年九十卒子煦仕南唐歸宋官至宣徽院承旨煦子素素子沆景洪與素皆以沆貴贈宰相國公永新人物志

歐陽廣吉水人武安節度使邊鎬昏懦無斷在湖南政出多門不合衆心廣上書言鎬非將帥才必喪湖南宜別擇良帥益兵以救其敗不報已而劉言襲鎬據之唐主思廣之言拜本縣令 林志

李續 一作績 字繼宗永新人少不事生產專志儒業嘗讀書廬山學成游建業會宋師南攻丹陽潤州節度使盧絳辟掌記授宣教郎江南既入宋隱居不出教授鄉黨郡倅温仲舒向敏中慕其賢皆勸之仕終不起年九十餘卒 同上

宋

王克貞字守節廬陵人南唐進士歸宋授太子中允知漢州以文學受知太宗與張洎同為誥命典正預脩太平廣記總類歷滑襄梓三州皆有善政史臣謂優於張洎云 林志

劉德言安福人南唐時寇亂德言率良家子弟捍閭里全活甚衆宋平江南以所統兵歸授文階仕至水部員外郎江南轉運使 同上

劉茂中安福人仕南唐以功授吉州兵馬監押累遷袁州刺史宋平江南茂中至京師太祖問曰卿在江南屢擾邊邑何也茂中對曰臣結髮事主惟忠勇是奮雖陛下親征臣亦殞身不顧太祖壯之授登州刺史 林志

按明一統志茂中作忠列入五代無授登州刺史事尹承諤永新人南唐時授本邑制置兵馬監押輯睦將校兵

江西通志 卷之十一
士樂爲之用入宋授左侍禁太宗嗣位轉供奉官會計邊
運事皆幹濟勅巡撫環慶還奏鄭州商稅欺弊因命按治
著爲令 同上

劉鶚字仲翔廬陵人開寶進士嘗撰法語八十一篇大略以
帝王爲治之法當法聖明卿士立身之法當法聖賢多引
經爲証所居號杉溪其讀書臺遺址尚存 同上

何晝永新人少讀書廬山白鹿洞宋平江南謁宋祖陳所著
書二十卷開寶五年登進士第官鳳翔觀察推官以文章

政事名 人物志

段鵠字正已永新人端拱進士與瑯邪王儼建陽李寅及孟
歸唐等入廬山國學讀書十餘年並有時名 白志

按段鵠前志以爲廬陵人今據科目考改正

尹絳泰和人少好學爲文師韓柳景德進士授天長簿改懷

寧爲政明敏廉潔吏不能欺請託不入終衡州通判 林志

彭齊字舒孟吉水人大中祥符進士爲楊文公億所賞拔官

至太常博士真宗嘗大書殿柱云彭齊之文章楊伾之廉

謹蕭定基之政事可爲江西三瑞 同上

王庭珪曰太博以文章擅名海內一時名公卿仰慕之
其醉墨戲語時見野史風味可槩見也

毛應佺字子真吉水人大中祥符進士知賓州地產多異物
宦其土者往往舳艫銜尾應佺比歸盡室一舟無錙銖餘

物歷虔韶太平通判 同上

楊伾字大中吉水人大中祥符進士授國子博士進尚書屯

田員外郎以廉謹名天下 同上

蕭定基字守一廬陵人天禧進士累官監察御史裏行蘄州守王蒙正恃勢賂誣屬縣長死罪詔定基往治遂正其獄除開封府判官遷侍御史宜州蠻為寇以定基為廣西安撫蠻不敢動官至淮湘荆湖制置發運副使卒贈兵部侍郎 同上

按宋史蕭服為廬陵人定基為服之祖林志乃別隸吉水今改正

歐陽觀字仲賓永豐人與弟曠同登咸平進士歷泗綿二州推官性仁孝歲時祭祀考妣涕泣如初喪治獄明慎矜惻每思求其生後任泰州判官卒以子修貴封崇國公 吉州人文紀略

按林志仲賓作仲實訛白志改正崇國事實具詳文忠

公瀧岡阡表中見藝文志

歐陽曠字日華為隨州推官治獄之難決者三十六人奇峰寺僧以奸利致富轉運使命曠籍之僧致白金千兩為饋曠笑而却之曰歲大凶汝有積穀六七萬能盡以輸官賑民則吾不汝籍僧喜諾盡輸之飢民賴以全活知桂陽有爭舟相毆至死者獄久不決曠出囚飲食之獨留一人曰汝持匕以左手今死者傷在右肋此汝殺之明矣囚即服罪歷知黃永二州以都官員外郎致仕 同上

王贄字至之泰和人天禧進士通判信州嘗閱帳籍得隱沒官物數百萬因條上鈎考之法著為令召進殿中侍御史天章閣待制兼知諫院間因奏事退上顧左右曰五方異稟若南士而有燕趙之氣王贄是也未幾置天章閣直學

士首以命贄英宗朝以禮部侍郎致仕神宗即位改戶部

侍郎歷事三朝尤被仁宗眷遇二子曰儀曰億豫章書

歐陽載字則之永豐人文忠公仲父也淳化進士乙科真宗

嘗自擇御史載以祕書丞召見見者數人皆自薦載獨立

墀下無所說明日拜監察御史中丞王嗣宗指曰是獨立

墀下者真御史也遷殿中侍御史出知泗州先是京師歲

早有浮圖人斷臂禱雨官為起寺於龜山其勢傾動四方

又誘民男女投淮水死曰佛之法用此得大利而愚民歲

死淮水者幾百人臨溺時用其徒倡呼前後擁之以入至

有自悔欲走者呼號不得免載聞之驚曰害有大於此邪

盡捕其徒詰其姦民誅數人遣還鄉里者數百人遂毀其

寺轉尚書司封員外郎三司戶部判官六年為廣南東轉

運使秩滿以一敝舟還無一海上物以足疾求知江州卒

吉州人文紀畧

王億字昌齡以廕當得官辭以待族人之貧者贄賢而許之

皇祐中以別頭進士中甲科仁宗見其狀貌偉異顧宋丞

相庠曰甚似王贄知酸棗縣除簽書吉州判官事贄既歸

老億得請知袁州以最績聞官至職方員外郎豫章書

蕭汝諧字君俞定基子以父任補祕書省校書郎登慶曆第

監廣州市舶歲入增百萬彭思永薦其可任臺諫熙寧初

輪對十事皆得大體子服別有傳同上

蕭汝士字君平定基子以父任補官知長汀縣時方行青苗

助役法置提舉按行郡縣盡責民所有輸錢於官又歲以

數萬緡籍縣之富豪者貧民則不與汝士曰助役之設以

民力不均故因貧富以賦財縣有五等版籍在可按而行之青苗之法以新陳不繼下戶不能自食則利權盡歸富人故令得貸於公儲粟以俟其求可也奈何反病之乎提舉變色曰子欲阻新法乎汝士曰今議法非阻法也力求罷去同上

歐陽修字永叔吉州永豐人四歲而孤母鄭氏親教修讀書家貧至以荻畫地學書比舉進士試國子監禮部皆第一遂中甲科以文章名天下景祐初為館閣校勘范仲淹為宰相呂夷簡所惡由開封斥知饒州諫官高若訥詆誚仲淹以為當黜修以書責若訥謂其不復知人間有廉恥事若訥以聞謫夷陵令仲淹帥陝西辟修掌書記修曰吾論范公豈以為利哉同其退不同其進可也辭不就慶曆初

召還知諫院改右正言知制誥故事知制誥必試仁宗知修之文有旨不試是時二府相繼罷去當局持論者惡修異已又以其善言情狀益忌之尋出知滁州徙揚潁二州留守南京以母憂去既免喪入見鬚髮盡白留刊修唐書書成拜禮部侍郎兼翰林學士在翰林凡八年知無不言嘉祐五年為樞密副使明年叅知政事在兵府與曾公亮考天下兵數凡邊防久缺屯戍者必加蒐補在政府與韓琦同心輔政時東宮猶未定與琦等協定大議神宗即位遷尚書左丞力求退除觀文學士知亳州青州時諸路散青苗錢修乞令民止納本錢以示不為利罷提舉官聽民以願請不報丐知蔡州力求致仕修嘗守潁樂其風土因卜居焉自號六一居士居潁一年而卒贈太子太師謚文

忠所著唐書本紀表志又自撰五代史易童子問三卷詩本義十四卷居士集五十卷內外制奏議四六集又四十餘卷四子發奕斐辨四朝國史傳

按前志據東都事略以文忠為廬陵人考公自序譜云祖居沙溪後分吉水置永豐縣沙溪分屬永豐今譜雖著廬陵實為吉州永豐人今采據四朝國史傳所著尚有歸榮集一卷集古錄跋尾十卷雜著十九卷

彭思永字季長廬陵人天聖進士初知分寧境安事治墾書褒嘉入為侍御史極論內降官賞之弊會明堂肆赦復抗疏論張堯佐王守忠倖進之非因罷知宣州尋以北路轉運使平南寇有功進工刑二部郎中改益州轉運使進戶部侍郎致仕林志

按豫章書神宗即位御史蔣之奇糾歐陽修陰事挽思永自助思永以為惟薄之私非外人所知詔問語所從來思永不肯對乃出知黃州此段林志不載原跋

曾朝陽永豐人慶曆間登第為石首令改忠州弟篚同登第為南安簿陞龍南令俗尚巫鬼篚嚴令禁止調信州判官移知玉山宋庠唐介司馬光富弼趙抃皆薦篚才可館閣未及用而卒朝陽孫元忠大觀間登第所著有春秋曆法論語解周易解等書門人私謚文節先生豫章書

蕭汝為字叔展吉水人四與鄉薦三作榜首時人號青錢解元丁父憂廬墓手植松柏數百株郡以孝廉聞子公敞紹聖進士奉母至孝鄉黨稱蕭孝廉有子云林志

劉沆字冲之吉州永新人祖照父素以財雄鄉里所居後隆

山有唐牛僧孺讀書堂故址沆母夢牛相公來而生沆以進士起家為大理評事稍遷太常丞直集賢院擢右正言知制誥陝西用兵沆見執政白事極言得失執政不悅曰須舍人作相自行之沆曰宰相豈有常哉時來則為之耳改知江寧歷開封府皇祐三年擢參知政事拜同中書門下平章事明年以觀文大學士出知應天府徙陳州卒元豐三年贈太師充國公 東都事略

歐陽穎字孝叔永豐人登進士及第官至尚書職方郎中歷知岳閬饒等州政務嚴明有威惠年七十三卒 府志

毛洵字子仁吉州吉水人天聖進士又中拔萃科性至孝凡守四官再以親疾解任執藥調膳嘗而後進三月不之寢室父應佺通判太平州卒官母高繼卒于池陽舟次持鍤

荷土以為墳手胠面黔親友不能識廬於墓凡二十一月朝夕哭踊食裁脫粟諸生請問經義對之流涕未嘗言文抱疾歸數日而卒郡以孝聞賜其家帛五十疋米五十斛兄溥字文祖亦以哀毀卒于舟中 宋史

李籌字彥良吉水人與弟衡字平國生同乳二歲喪母十歲喪父兄弟每以不逮事親為恨政和中改葬其母於廬山負土成墳廬于墓左未幾廬所產木一本兩榦高丈許復合于一至其末乃分兩榦五枝鄉人以為瑞 同上

楊芾字文卿吉水人性至孝歸必市酒肉以奉二親未嘗及妻子紹興五年大饑為親負米百里外遇盜奪之不與盜欲兵之芾慟哭曰吾為親負米不食三日矣幸哀我盜義而釋之 同上

按林志載李籌不及楊芾安志載毛溥字之坦以為南唐人不及洵白志依宋史李籌兄弟及楊芾皆附毛洵傳後今從志體另傳

蔣賁字國華龍泉人天聖進士通判廣信軍有心計嘗募江南船匠造鎖楸船人工物料比舊減省而可以興漕運之利杜侵欺之奸歐陽修奏取其法行之賁通知利病之源與度支判田況議處出入之數況乃為皇祐會計錄上之後名為三司鹽鐵判官

林志

梁材字勁節龍泉人弱冠有文名嘗應詔上書規切時政當事者惡其語直罷歸尤工樂府胡銓王庭珪俱極推之以為李賀復生族孫文惟正用璋皆以雄才博學卓冠一時人稱吉州三鳳

府志

劉瑾字元忠吉州人沆之子第進士為館閣校勘沆亡得褒贈知制誥張環草詞語涉譏貶瑾泣涕衰經詣宰相自言朝廷為改書命黜環為州瑾亦坐經服入公門罷職沒喪不就官可守墳墓王素為請以申孝子之志詔復職遷集賢校理通判睢州為淮南轉運副使召修起居注加史館修撰河北轉運使拜天章閣待制知瀛州改鎮廣州與樞密院論戍兵不合改虔州知江州歷秦州成德軍卒瑾素有操尚所莅以能稱

宋史

郭佺舊名僅泰和人與子之美同登景祐進士名冠于朝所居名冠朝里時永豐董洙父子亦同科進士里諺云董洙三父子郭僅兩爺兒佺終河南運判贈太常博士

豫章書

郭之美佺子官至屯田員外郎通判定國軍編修國史遷集

賢學士故有讀書臺在層溪上今尚存 同上

郭青螺曰吾吉科第雖盛而父子同科進士自吾家太常集賢始也

嚴震一名宣泰和人慶曆進士任常州推官嘗充考試官識名士錢公輔于糊名易書中人服其藻鑒嘗與玉岐公珪同場屋珪高其議論密為延譽為人持身端潔在官以薄自奉推所餘以給族之貧者 林志

毛君卿字公弼吉水人慶曆童子科執政薦其才上殿敷奏六事皆合上意除知建昌軍官至中議大夫 人物志

胡衍字昭叔泰和人慶曆進士宰真陽嶺南無田之民例輸身丁米衍為言于外臺部使以聞適陳執中秉政陳知梧州時亦嘗奏及此梧人得免至是朝廷以前例可其奏衍

性坦率內外洞徹所至以循良稱 同上

歐陽發字伯和修之子少師胡安定瑗盡傳其古樂鍾律之說不治科舉業蘇軾謂其得文忠之學蓋漢伯喈晉茂先之徒以父蔭官至大理寺丞所著有古今系譜圖宋朝二府年表錄 林志

歐陽棐字叔弼以父修蔭守秘書省正字及長舉進士章惇入相以祕閣校理知襄州元符三年還朝為吏部郎中請外以直祕閣知蔡州係元祐籍鐫秩罷初修以道德文章為三朝所知學士大夫人皆師尊之棐亦能以文學世其家有文集二十卷其他著述又五十餘卷 東都事略

譚觀光字元賓永新人性至孝居喪廬墓有白兔白鹿之異政和進士其弟觀復子孚先觀成子紹先皆以孝聞後子

孫繁盛宋末文信國勤王郡人從之者三族即張綱顏詡與觀光之裔也 永新人物志

蔣槩字康叔賁之子皇祐進士宰巴東日與周濂溪遊治平間京師大水疏推本洪範極言朝政闕失 林志

嚴顥字威卿吉水人皇祐進士為河源令持身以廉邑人惜其去餞以海錯舟行十里餘家人發缶得黃金以告顥亟命停舟召餽者還之 同上

吳瓘字伯玉永新人皇祐進士家居縣南連岡闔門數百口以孝弟稱蘇軾薦為檢討除徐州通判 同上

蕭世京字昌孺龍泉人嘉祐進士為廣東路提舉常平公事蔡京為戶部尚書平章事矜已自任世京多與之忤因舉奏蔡京十事京由是銜之罷歸會徽宗於禁中得世京所

上書即擢為吏部員外郎賜金紫 人物志

蕭佐字公弼龍泉人嘉祐進士歷宰四邑遷知汀州在信豐為郡守劉彛所知彛執其手曰君志欲靖民真儒者事業也論薦之汀儒士鮮少庠序僅有存者佐闢而新之又斥公田以供廩餼文風丕振 林志

蕭世範字治藩龍泉人嘉祐進士為南雄推官憫運夫之苦始制小車以代之一車可勝數人之載公私稱便改廣西轉運判官以恩信示蠻獠蠻亦悅信之 同上

郭知章字明叔龍泉人治平進士敷歷邑州俱有政績入為殿中侍御史遷右司諫契丹遣使為夏人勸和河西事以知章報聘詞婉而氣直官至翰林學士後以元祐名人落職奉祠 人物志

蕭勃吉州人皇祐中以殿丞知南雄州精于吏事處煩劇有餘暇儂智高寇報至急築斗城以備之民得無恐在事三年庶政畢舉及代攀苗不可相與建祠祀焉廣東名宦志

蕭服字昭甫廬陵人舉進士調望江令治以教化為本移知高安縣尉獲兇盜獄具矣服審其辭疑之且視其刀室不與刃合頃之而殺人者得囚蓋平民也徙知康州改親賢宅教授入對論人主聽言之要纚纚數百言徽宗謂有爭臣風奉詔作崇寧備官記帝稱善語輔臣曰服文辭勁麗宜居翰苑朕愛其鯁諤顧諫官何可缺此人張商英當國引為吏部員外郎以父老請蘄州宋史

按蕭服汝諧之子定其之孫林志以為吉水人者訛豫

章書載其所著有接伴遼使語錄并文集十卷

羅審理字安行龍泉人進士宰太康疏濬康溝漑田萬餘畝歲饑發倉賑貸春大雪募民貿易柴炭增其市估所全活以萬計詔使行視最書方上而卒邑民悲之賻錢五十萬其子辭不受林志

按前志有董敦逸傳據東都事略敦逸在言路指斥蘇氏兄弟涉于傾危不應列入人物今削

劉顯字微之吉水人元豐進士為光祿主簿曾布當國顯為甥壻恬退自持後布貶顯得免倅虔州時甘露降于治解之松者三憲使張景修為立仁澤堂作詩記之林志

彭淳字道源廬陵人歷守康賀二州所至有惠政嘗上書譏切王氏之學同上

段子冲字叔謙廬陵人自少力學不倦築小齋藏書數萬卷無復嚮用意郡以遺逸八行舉固辭不就自號潛叟 同上

劉弇字偉明吉州安福人兒時警穎日誦萬餘言元豐進士

繼中博學宏詞科知嘉州峨眉縣改太常博士元祐中有事于南郊進南郊大禮賦哲宗覽之以為相如子雲復出

除祕書省正字徽宗即位改著作佐郎實錄檢討官以疾卒官弇性不事拘檢為文剷剔瑕類卓詭不凡有龍雲集

三十卷周必大序其文謂廬陵自歐陽文忠以文章續韓文公正傳為一代儒宗繼之者弇也其相推重如此 宋史

彭瑜字君玉吉之安福人熙寧間失其母瑜朝夕焚香祈天

願知母所在如是十餘年俄有人言母為泰和倪氏婦瑜竟迎以歸 同上

張翔字陞卿更名庠字元道永新人嘗著斥蠹正言二書以

排佛老作元經圖以明五行六度之祕鄭獬吳處厚錢明逸咸質款焉號白雲先生 永新人物志

曾肅字温夫泰和人性純孝居父喪廬墓側有慈烏來巢之

祥黃庭堅知泰和時嘉其行稱為清高處士云 林志

左書言永新人元豐進士授鄧州教授嘗括廢田三千頃以

贍生徒學字一新經術大明 永新人物志

高文中字景通吉水人元豐進士任南安叅軍郡大水公私

廬舍多仆文中急開獄縱囚諭之曰汝之罪有死有不死不幸獄壓則均死矣水退當復至翌日水退無一人亡者

後知邵州尤多遺愛 豫章書

郭知微字介卿龍泉人元豐進士授桂陽令三年無警去官

民常思之後峒民嘯聚當路撫之曰使郭知微再來吾即歸附時知微已卒遣其子登仕郎獬至峒民乃散

林志

楊存字正叟吉水人元豐進士知仁和縣有尼挾時宰勢欲

強取寺外民地府守謂存曰此宰相意也從之必見德存曰三尺之法入主所與天下共也由宰相亂之不可卒不

與官終中奉大夫

同上

王端禮字懋甫吉水人元祐進士任富川令政皆行其所學平居慕濂洛慨然以道自任所著有強仕藁論語解易解

疑獄集子鴻舉字南賓亦以文名

豫章書

按楊誠齋題南賓行狀詩云吾鄉前輩王南賓讀書萬卷筆有神屢登天府獻和璞玉工過眼珉奪真其重惜如此

葛敏修字聖功廬陵人元祐三年試禮部蘇頲濱知貢舉奇其文擢高等仕為確山令未幾罷敏修為人孝友兄敏求敏明連喪慟悼不勝發疾而卒有道岷集三十卷胡忠簡為之序初宰確山以元符上書被禁錮時論多之

吉州人

文紀畧

按周益公葛聖功文集序云元祐三年東坡知貢舉奉議郎葛公奏名第七又云崇寧元年九月詔書定元符有名人五百四十一人敏修姓名在焉由此罷確山宰廢于家越三年始免禁錮謂公困久當少折其詩乃云從今黽勉為忠義一噓如何便廢餐味公此言豈以利祿得喪貳其心者使天不奪之年得進為于世不負東坡審矣據此則敏修乃東坡門下士非穎濱也

原跋

王庭老廬陵人紹聖鄉舉官嶺南徽宗開辟雍制先聖冕服博議無準廷臣具薦庭老於是自賓州驛召至為禮制局檢討人物志

張汝明字祖舜泰和人元祐進士初任司諫有直聲時蔡京蔡卞當國汝明上疏劾奏之謂文武兩權盡出兄弟之手臣竊危之徽宗召拜御史後知岳州性至孝父病瘍刺血和藥既葬廬墓側母喪病羸行踣夢父授以服南星法用之乃愈人物志

按林志汝明所著有易索張子前言張子卮言大宛經諸書

段蕢字仲實廬陵人元祐進士任南安主簿時蘇轍監高安稅一見異之日與論文手為校正國語等書文名益著林

志

劉鼎臣字和之泰和人紹聖進士以大庾主簿攝吉水尉上書言十事用事者惡其切直以元祐指名禁錮累年遇八寶赦授雩都令終南安知錄同上

艾君瑜永豐人性至孝母疾革刲股和藥以進病果愈母喪廬墓崇寧中郡守以聞詔復其家同上

劉章字微之廬陵人領鄉貢不第上書言時事不忌權貴蔡京用事籍章名為邪黨宣和三年始以免解登進士人物志

蕭楚字子荆泰和人元符鄉舉其學以窮經為本尤深於春秋著經辯四十九篇會蔡京万貴盛楚遺書馮解謂蔡必召亂誓不復仕隱居三顧山下築讀書臺胡銓楚之門人

登進士歸拜牀下楚曰身可殺學不可辱無禍吾春秋銓
議論懇切卓然為天下名臣楚與有力焉門人私謚曰清

節先生 林志

曾安強字南夫泰和人登乙科調舒州法曹後提舉成都路
常平至則民訴旱決灌口水以灌田歲因大穰士民刻石
江上號均水記先是廬肆多火無以瀦水安強按地為溝
三百所或病之俄得斷碑乃張詠疏渠積水記中一一如
所經畫時朝廷遣中人督上供帛有鄧述者挾持尤甚市
物不中意輒焚燬安強疏其事徽宗斥述不用會戶部議
糴東南粟百萬顧左右未不知所對上曰曾安強可遂除河
南常平居七月即罷卒於家初安強與兄安止安中皆擢
第郭知章挽其母劉詩曰一門十捧鄉老書四子五折東

堂桂西昌科目之盛曾為稱首云 吉州人文紀略

李穀字頤正龍泉人紹聖進士歷高安令有重囚三十二人
其二已死于獄蓋尉欲希賞以盜誣之也穀將直之尉嗾
被盜者告于州旬日獲真盜于宜黃錄囚辭以報三十人

皆免 林志

朱蒙聖字聖功吉水人崇寧進士當路交薦以親老辭授豫
章糾曹以歸中途聞母訃冒暑奔赴毀瘠而卒 豫章書

歐陽珣字全美吉州廬陵人崇寧進士調忠州學教授南安
軍司錄知鹽官縣以薦上京師遇國難及出使加將作監
丞金人犯京師朝議割河北絳磁深三鎮地講和珣率其
友九人上書極言祖宗之地尺寸不可以與人及事急會
羣臣議珣復抗論當與力戰戰敗而失其地它日取之直

不戰而割其地它日取之曲時宰怒欲殺珣迺遣珣奉使割深州珣至深州城下慟哭謂城上人曰朝廷為姦臣所誤至此吾已辦一死來矣汝等宜勉為忠義報國金人怒執送燕焚死之 宋史

按監丞既被難朝錄其忠無子官其壻曾敏恭此段史傳失載 原跋

孫叔通字深道龍泉人初以薦至京因星變陳言請開黨禁召用舊人忤蔡京以歸政和二年中進士第歷官清海節度推官時方禁史學士至有不知魏晉者叔通儲書萬卷歷代興廢治亂得失叩之響應時號孫書庫 林志

郭允升字彥信泰和人政和進士宰零陵時蠻獠擾民彥信下車未久咸服其化而馭吏尤嚴改知安化縣多虎害有

父子繼死于虎者彥信蒞政虎皆遁去 同上

劉琮字粹老吉水人大觀進士歷仕諸王宮翊善金人議立

張邦昌使范瓊以兵脅在城百官勸進琮自服利藥疫勢委頓使至門見琮不能支乃不果逼邦昌大為之愧有文

學平生著述最多 同上

郭孝友字次仲龍泉人政和進士任國子司業時蔡京再相

天下益多事孝友因奏對燕雲事當國有不悅者計謫瑞

金後提點兩廣東西路刑獄捐騶從躬親按歷貪酷守令

劾奏不宥累官工部侍郎秦檜與金人約和廷議多不合

檜以孝友同舍生冀其附已孝友曰議和本非至計因遂

銷兵如後患何士大夫豈好生事者願審思之檜不懌曰

次仲亦爾耶以敷文閣待制致仕 同上

楊邦乂字晞稷吉州吉水人以舍選登進士第遭時多艱每以節義自許歷知溧陽縣會叛卒周德據府城殺官吏邦乂立縣獄囚趙明於庭欲誅之因諭之曰爾悉里中豪傑誠能集爾徒爲邑人誅賊不惟宥罪當上功畀爵明即請行邦乂飲之卮酒使討平之建炎三年金人至江上高宗如浙西留右僕射杜充爲御營使金人逼城時李昫以戶部尚書董軍餉陳邦光以顯謨閣直學士守建康皆具降狀逆之十里亭金帥完顏宗弼旣入城昫邦光率官屬迎拜惟邦乂不屈膝以血大書衣裾曰寧作趙氏鬼不爲他邦臣翼日宗弼等與昫邦光宴堂上立邦乂于庭邦乂叱昫邦光曰天子以若扞城敵至不能抗更與共宴樂尚有面目見我乎有劉國練者以幅紙書死活二字示之邦乂

奮筆書死字金人相顧動色然未敢害也已而宗弼再引邦乂邦乂遙望大罵宗弼大怒殺之剖取其心年四十四事聞贈直祕閣賜廟褒忠謚忠襄官其四子邦乂之被囚也有陳泰伯在旁不去邦乂罵宗弼泰伯亦舉臂擊之遂同死又有賈山郎者亦同時被執山郎陰命其子結里人爲鬻茅者置兵于茅以入事覺父子並磔于市又有楊再興痛主之死誓必報仇投岳飛帳下旗校敵至力戰陷陣死獲其尸焚焉得箭鏃二升朝廷聞之皆官其一子邦人肖其像從祀云 宋史

按陳泰伯以下三人里居未詳忠節之事史家牽連書之今亦不復刪去 原跋

楊祀字元卿吉水人政和進士始與兄邦乂同讀書每相勵

曰爵祿不必力取當力取名節耳邦又死節祀宰貴池經理其家而收恤其孤以歸人皆歎曰兄忠于君弟忠于兄

人物志
按楊祀林志作祀未詳孰是

劉才邵字美中吉州廬陵人宣和二年中宏詞科遷司農寺丞校書郎以親老歸侍居間十年御史中丞廖剛薦之召見遷祕書丞歷吏部員外郎典右選事先是宗室注宮觀岳廟例須赴部遠者或難于行才邵言許經所屬以聞于部依條注擬行之而便未幾為中書舍人兼權直學士院帝稱其能文時宰忌之出知漳州即城東開渠十有四為牖與斗門以瀦匯決漑田數千畝民甚德之召拜工部侍郎兼直學士院尋權吏部尚書以疾請祠才邵氣和貌恭

方權臣用事之時雍容遜避以保名節所著樵溪居士集行世 宋史

嚴執中字子權泰和人元符鄉舉任新建主簿丞相趙鼎叅政李光繼見其論議文采力薦之執中請老益堅既得謝放意文字箋經勘史不釋手里中士遊其門者多為聞人

林志
劉在中字伯正泰和人政和進士報捷日在中方鋤圃聞之弛笠謝恩雖衣冠儼飾而笠繫之痕猶宛然可見其淳篤如此官永州錄事叅軍 人物志

嚴彥博字文益泰和人居鄉以德義稱博極羣書尤邃于理學雅好修煉著內外丹圖訣政和間詔求遺書使者聞其名即所居訪焉見其童顏翠葆知其必有所養與語奇之

遂狀其道術并所著圖訣上之自號葆真居士 林志

王庭珪字民瞻安福人以貢入太學時方禁士人說詩庭珪獨吟詠自若中政和進士任茶陵丞忤部使者拂衣歸胡銓上封事忤檜謫嶺表親舊無敢通問庭珪獨送以詩坐謗訕流辰陽孝宗初召對賜坐勞問除直祕閣一子扶掖上殿亦予官卒年九十餘所著有瀘溪集楊誠齋為之序 吉州正氣錄

按吉州人文紀以庭珪為重和進士者訛今據科目考改正又按胡忠簡謫官時有寺丞陳剛中以啓賀之云身為南海之行名若太山之重知無不言願請尚方之劍不遇故去聊乘下澤之車亦坐貶安遠庭珪晚年再召而剛中竟死于貶所無子其妻削髮為尼同時同事

幸不幸如此 原跋

曾民瞻字南仲永豐人宣和進士少通天文為南昌尉置晷漏圖範金為壺刻木為箭壺後置四盆一斛壺之水資于盆盆之水資于斛其一注水則為銅蚪張口吐之箭之旁為二木偶左者晝司刻夜司點其前設鐵板每一刻一點則擊板以告右者晝司辰夜司更其前設銅鉦每一辰一更則鳴鉦以告又為二木圖其一用木薦之以測晷景其一用水平之以法天運自謂得古人所未至 林志

尹躬字商老永新人宣和進士為江西僉書決獄吉水有繫逋賊者十餘人男女貫于一索聞躬來密置他所躬廉知盡釋之其他異政尤多所著有易解冬官解 人物志

高應科安福人登童子科高宗引至便殿問曰汝童子也何

為在朕前應科對曰務引其君以當道上悅命傳送六宮
賜錢綵而歸同上

葛濂字德源廬陵人端醇詳雅貫通子史胡澹菴周平園互
聘為弟子師幼失怙恃依仲父緯學緯老而貧養生送死
皆濂主之安于恬退故終老于鄉林志

羅上行字元亨廬陵人建炎進士少負奇氣以功名自許時
岳飛奉命討洞庭巨寇楊么檄上行督餉諸郡至全州通
判范寅倨傲不與上行抗責之乃發廩帑以應知上猶境
內大治部使者上其狀請頒其條教為諸州縣式同上

趙伯深字逢源安福人父子徊官棣州宣和間被檄往塞上
未幾金人渡河伯深母子相失建炎二年子徊南歸而不
知母所在伯深尋母二十餘年偶聞流落瀘南奔走入蜀

至紹興二十一年秋乃得見焉相持號泣扶持歸家以壽

終豫章書

按趙伯深人物志不載達源吉州正氣錄作逢源周益
公有跋趙逢源得母詩卷後曰余少時親見其迎侍歸
來名士如曾端伯晁子西程詠之皆贈以詩云云其為
逢源無疑當據此改正原跋

歐陽鈇字伯威廬陵人少負氣節有文章其詩騷最工能發
前人關鍵楊誠齋愛其詞至手抄警句誦之王庭珪劉永
弼楊愿每以孟襄陽賈長江相比蓋一時人豪也林志

曾光庭字南卿吉水人仕為東安簿靖康之難勒兵勤王會
徽欽北狩光庭以兵趨南京列表勸進高宗既踐祚光庭
辭不受賞孫三復乾道進士歷太常少卿上疏正太祖裕

祭東向位改權刑部侍郎致仕

蕭環字國器泰和人以詩名一時靖康建炎間嘗糾合義丁

捍衛鄉里時叛將杜彥攻陷永豐縣尹趙訓之死之環往

援以禮葬焉

林志

梁棟字充道龍泉人以直言為用事者所忌遂不復進取晚

以肖顏名堂周必大常從之游因作記稱為隱君子云

同上

劉彥登字允升永新人由舍選登進士後提兵討虔寇郡境

以安歷官三十年終朝請大夫知漢陽軍所著有竹溪文

集

豫章書

陳千齡泰和人建炎進士官韶州曲江簿有潮陽令以軍事

犯贓權貴多為之地檄千齡推鞠援者踵至夜饋以金不

受至推問得實陞虔州司法叅軍

人物志

李靚字彥和吉川龍泉人幼孤母督之學不肯卒業母詰之

辭曰國家遭女真之變寓縣雲擾士當捐軀為國戡大憝

安能咕囁章句間效淺丈夫哉岳飛督師平虔寇挺身從

之未行奔母喪服除走淮南以策干都督張浚浚奇之使

隸淮西總管孫暉鎮下以功授承信郎紹興十年金將翟

將軍犯境靚與部曲當其鋒轉戰至西京天津橋南俘翟

將軍乘勝逐北會金師大至遂死之年三十一

宋史

胡銓字邦衡廬陵人建炎二年高宗策士淮海銓荅策萬餘

言將冠多士有忌其直者移寘第五授撫州軍事判官丁

父憂從鄉先生蕭楚學春秋紹興五年以賢良方正薦賜

對除樞密院編修官八年宰臣秦檜決策主和金使以詔

諭江南爲名中外洵銓抗疏乞斬王倫秦檜孫近書上除名編管昭州朝臣多救之者檜迫於公論乃以銓監廣州鹽倉改簽書威武軍判官編管新州移吉陽軍檜死量移衡州銓所上書進士吳師古鋟木傳之金人募其書千金孝宗即位復奉議郎擢起居郎兼侍講史院編修官時旱蝗星變詔問政事闕失銓應詔上書數千言始終以春秋書災異之法言政令之闕有十而上下之情不合亦有十又言和議成有可弔者十和議不成有可賀者亦十尋乞致仕除敷文閣直學士與外祠陞辭猶以歸陵寢復故疆爲言所著易春秋周禮禮記解詔藏祕書省薨謚忠簡有澹菴集一百卷同上

周子充曰人臣犯顏逆耳上撻人主之怒下爲權奸切

齒或誅或斥何可勝數未有九重特伸詔諭禁近引誼申救曾不四旬謫命三改者當是時胡編修名震天下朝士陳剛中以言餞行貶令安遠之死靡憾鄉人王庭珪賦詩贈別竄徙夜郎反以爲榮遐方裔土莫不傳誦其書雖敵亦因是知中國之不可輕蓋天理所存自公達之人心所憤自公發之

彭元亨字文昌安福人父病篤禱于神乞損已壽以益親年父尋愈嘗服膺呂東萊辨志早夜力行不怠君子謂其見善如力耕云林志

劉獬字去邪泰和人宣和鄉舉爲衡州司法官歲饑民有窘于衣食犯法死者數十人獬請從末減太守怒碎節目擲諸地獬拾補以進守意乃釋數十人皆賴全活後爲東流

令寇騎南牧東流止隔一水解調民防江以片紙榜縣遠
近胥集 同上

劉大有字處謙安福人于書無不讀嘗曰人皮以篋我皮以
腹所著文五百篇曰遯齋野錄 同上

羅棐恭字欽若吉水人建炎進士授虔州司理叅軍宣諭使
命鞫賊賊富且黠故有以持有司至是復餽錢二十萬求
脫棐恭竟論殺三十人移潭州平反死獄十一人遷荔浦
令荔浦民輓粟五千石餉宜州棐恭言于轉運司曰縣抵
宜州絕遠不通舟楫輓餉不便改知石城構捕宿盜七十
人減民稅紹興二十二年簽書道州軍事朝旨命鞫邵州
民張臣駟獄初臣駟為讎誣與賊通獄吏得賂力主讎家
遂起大獄連坐者三百餘人瘐死者七十人黔而流者一

十八人没入贖產者十八家棐恭廉得其實正獄吏罪而
前獄盡得釋通判贛州俗憎女生則溺之乃作溺女戒文
下十邑悉禁民之溺女者隆興初胡忠簡銓力薦於朝授
左朝奉大夫知武岡軍以疾卒其學邃於名數字書有詩
文三十卷行世 吉州人文紀畧

解元字善長吉水人疎眉俊目垂手過膝能百步穿楊葉號
小由基初起兵保安軍德清積功授清澗都虞候建炎三
年詔隸韓世忠擢偏將軍世忠出下邳聞金人大至元領
二十騎俘其生口俄而復出敵騎數千四面集擲身陷陳
左右鷲擊大呼聲振刀甲衆辟易遁去以功授閣門宣贊
舍人苗劉之變從世忠討平之金人攻浙西世忠邀之京
口橫海舟以截江敵出小舟數千以長鈎扳艦元躍入其

舟大呼擊殺數十百人以功授中州團練使統制前軍討
閩寇范汝為及湖外諸寇功皆第一紹興四年金人及僞
齊入寇世忠自鎮江趨揚州元趨辰州金兵大至元度明
日必至城下先遣百人伏于要路百人伏于岳廣自以四
百人伏于路隅金人果走岳廣追獲不可勝計金萬戶黑
頭虎最號驍勇直造城下會語元即跳下城擒之追奔十
餘里金人自驚擾溺死十餘萬人改同州觀察使保順軍
承宣使加授神龍衛四廂都指揮使世忠罷兵柄為樞密
使以元統世忠之眾進侍衛親軍馬步都虞候封太原郡
公保信軍節度使見朝廷專主和議屢表諫上不聽知大
功不建感激發病薨時年五十四贈檢校少保孝宗追封
太原王諡忠武 春雨堂集

按宋史解元傳云保安軍德清砦人未詳移家吉水本

末林志不載白志采補

張翬永新人字文奐紹興初以積功授官乾道八年江西大
旱翬捐粟助賑帥臣以聞升閣門祇候官至武義郎居鄉
樂善好施以億萬 豫章書

王珠字仲淵吉州龍泉人以孝謹聞建炎間居父憂芝數本
生墓側倒植竹以為杖復生柯葉紹興間再罹母憂有雙
竹靈芝之祥 宋史

劉禹錫永豐人筠州司理叅軍左相虞允文表署江州觀察
推官為政以寬為本民愛慕之不忍欺後至湖北路提刑
一日歸忽有持金帛來者曰公生我者也願獻此以謝禹
錫固辭從者私受之事覺索而投之江中從者載一缸于

舟尾禹錫命碎之曰無汙我

林志

羅濬字明甫龍泉人與弟克開自為師友從學常百餘人每

語其徒曰古之學者下學上達今文雖小技自有上達之

理但為科目所累故判為兩途耳胡銓見而奇之曰君造

詣自高願常相與講明此理

同上

蕭穎字彥實安福人紹興進士知耒陽縣後起為廣東漕屬

居官清直能理獄訟父老為之語曰訟無苦逢父母

人物

志

胡鎬字從周廬陵人任新淦尉兄銓謫海外鎬甘退二十年

終不求謁張浚始薦進之除諸王宮教授樞密劉珙嘉其

靜退謂朝廷當以中祕處之不果請外補授湖南叅議

林

志

左慶延永新人紹興進士秦檜欲妻以孫女力辭不就或曰

不利慶延曰士一失身則無以復立苟不利退而山林亦

自多矣遂西歸檜憾之十年不調後以太學博士終

人物

志

按左所著有澹園文集胡應春序之曰觀其與晦菴書

問荅反覆必極其底止使得行其志斥奸排佞豈止辭

婚權檜而已哉

劉建直字諤卿安福人紹興進士得伊洛之學于胡文定以

浩名齋官終宣教郎知新喻縣以奉議郎致仕

楊誠齋集

毛惠直字嵩老吉水人紹興進士授邵武主簿時光澤令以

非罪繫獄惠直閱獄詞多文致即平反之進漢川令拒縣

尉培克之策杜太守黷貨之非惠直歎曰媿民以自安去

國以安民兩言決爾遂引疾上印綬去 林志

劉安世字世臣安福人紹興進士知雩都有郡官諷以羨餘

獻者安世曰縣土田瘠而賦重安得有餘必若是吾有去

耳遂以疾辭安世之學以明道通經為主遠近從學者踵

至卒之日門人私謚清純先生楊萬里為之制服 同上

周必大字子充廬陵人紹興間進士中博學宏詞科教授建

康府召試館職高宗讀其策曰掌制手也守祕書省正字

館職復召試自此始孝宗踐祚除起居郎上初御經筵必

大奏經筵非為分章析句欲從容訪聞裨聖德究治體兼

編類聖政所詳定官權中書舍人嘗論邊事上以蜀為憂

對曰蜀民久困願詔撫諭事定宜寬其賦權給事中繳駁

不辟權倖金索講和時舊禮必大條奏請正敵國之名趙

雄使金賫國書議受書禮必大立具草畧謂尊卑分定或

較等威叔姪親情豈嫌坐起上褒之曰未嘗諭國書之意

而卿能道朕心中事此大才也兼權兵部侍郎尋權禮部

侍郎改翰林學士在翰苑幾年制命溫雅周盡事情為

一時詞臣之冠除叅知政事拜樞密使上諸軍升差籍時

點召一二察能否主帥悚激無敢容私又劾諸軍點試法

淳熙十四年拜右丞相明堂加恩封濟國公進左丞相許

國公叅政留正拜右丞相上以內禪意諭二府二月辛酉

朔降傳位詔翼日吉服御紫宸殿必大奏陛下巽位與子

盛典再見度越千古顧自今不得日侍天顏因哽噎不能

言上亦泣然曰正賴卿等協贊新君光宗問當世急務奏

用人求言二事三月進少保益國公改判隆興辭除醴泉

觀使寧宗即位求直言奏四事曰聖孝敬天崇儉久任慶元元年三上表引年遂以少傅致仕自慶元以後韓侂胄之黨立偽學之名以禁錮君子而必大與趙汝愚留正實指為罪首薨年七十有九贈太師謚文忠寧宗題其墓碑曰忠文耆德之碑自號平園老叟著書八十一種有平園集二百卷子綸宋史

胡彥英字公武忠簡銓從子博學強記傳論語釋史漢尤長于詩多警句人物志

梁俊字克端龍泉人進士南安推官廉明多所興除民有繼母欲殺害前母子走免訴於官有司莫能窮俊鞠之緩其獄誘以善言使自悔母果服慈愛如已出子亦盡孝養事聞上曰非卿燭理明無以活百姓也擢侍御史兄偉元豐

八年進士信豐主簿孫岳建炎二年進士虔州司理俱峻風采所至稱治焉三華集

胡昌齡銓從子同事蕭楚學春秋乾道間以特奏名對策萬餘言官靜江司戶廉潔平恕滿一歲去帥守張敬夫留之不可乃賦詩餞之人物志

徐志道吉水人金兵遊騎奄至邑志道與弟志遠昇母逃為流矢所中挾矢行數舍而卒志遠負母撫兄痛哭幾絕金兵追至備告以故兵懈解戈而謝曰此一門孝友也遂釋之安志

按安志孝義傳宋時尚有泰和羅伯壽吉水周伯淳弟伯用為附錄於此

江西通志卷第七十五

中子景端夫留

江西通志卷第七十六

人物十一

吉安府二

宋

羅泌字長源廬陵人學博才弘侈遊墳典迺搜集百家成路
史始自邃古有夏之後弗傳前紀九卷後紀卷十有四國
名紀八卷發揮六卷餘論卷十通計四十七卷集成於乾
道間西蜀費輝序行於世男莘能世其學嘗為路史註

吉
州人文紀畧

楊萬里字廷秀吉水人紹興進士為永州零陵丞時張浚謫
永杜門謝客萬里力請見浚勉以正心誠意之學萬里服
其教終身知奉新縣陳俊卿虞允文交薦之召為國子博

士侍講張栻以論張說出守袁萬里抗疏留栻公論偉之
出知漳州尋提舉廣東常平茶鹽盜沈師犯南粵帥師往
平之孝宗稱之曰仁者之勇遂有大用意俄以憂去淳熙
十二年五月以地震應詔上書所言者凡十事約數千言
親擢爲侍讀隨事規警太子深敬之王淮爲相一日問曰
宰相先務者何事曰人才又問孰爲才即疏朱熹袁樞以
下六十人以獻淮次第擢用之歷樞察院檢詳遷左司郎
中十四年夏旱萬里復應詔疏四事以獻言皆懇切遷祕
書少監以直祕閣知筠州紹熙元年借煥章閣學士爲接
伴金國賀正旦使出爲江東轉運副使權總領淮西江東
軍馬錢糧朝議欲行鐵錢於江南諸郡萬里疏其不便改
知贛州不赴乞祠提舉萬壽宮自是不復出矣卒年八十

三贈光祿大夫萬里爲人剛而褊韓侂胄用事欲網羅四
方知名士嘗築南園屬萬里爲之記萬里曰官可棄記不
可作也侂胄恚改命他人臥家十五年皆其柄國之日也
侂胄專僭日益甚萬里憂憤怏怏成疾家人知其憂國也
凡邸吏之報時政者皆不以告忽族子自外至遽言侂胄
用兵事萬里慟哭失聲亟呼紙書曰韓侂胄姦臣專權無
上動兵殘民謀危社稷吾頭顱如許報國無路惟有孤憤
又書十四言別妻子筆落而逝萬里精於詩嘗著易傳行
於世光宗嘗爲書誠齋二字學者稱誠齋先生賜謚文節
宋史

按誠齋在粵東以書生親履行間不數月聞賊以平其
檄召諸郡兵詩云貔虎諸方集纜槍一笑空區區鼠子

輩不足奏膚功其平賊班師詩云不是潢池赤白囊何
緣杖履到潮陽官軍已掃狐狸窟歸路莫孤山水鄉讀
其詩雄才大畧凜凜猶有生氣惜乎當時用未竟也史
家謂孝宗愛其才以問周必大必大無善語由此不見
用愚竊謂不然觀益公致政後誠齋亦相繼歸田末路
往還倡訓情好頗密篇章具在可考而知也益公固非
忌才者誠齋又豈匿怨而友者哉

原跋

嚴致堯字正之岳飛授鉞專征道出廬陵所過搜訪奇士致
堯一見語合許以從行初龍泉賊帥彭友等盤踞四年攻
破八縣至是就縛奏凱而還其後定鼎澧安湘漢取唐鄧
復郢隨致堯皆在軍中屢委以事積功版授七階方將長
驅宛洛而武穆罷兵柄矣致堯無以白杜郵之冤歸而自

放山水間自號龍洲居士有文集三十卷

林志

王子俊字材臣吉水人嘗從楊萬里周必大游乃延譽於晦
菴朱子勉以博取約守之功又書格齋二大字遺之所著
有史論師友緒言三松類藁行於世

人物志

按楊廷秀嘗評材臣之文謂史論有遷固之風古文有
韓柳之則詩句有蘇黃之味至於四六踵六一東坡之
步武超然絕塵自汪彥章孫仲益諸公而下不論也其
推重如此惜今不傳

原跋

羅良弼字長卿廬陵人博學強記上下數千載間成敗利鈍
灼見如縷少與胡銓肄舉業銓賦詩云笑春燭底影滯淚
風前杯吟未畢良弼曰出某書某卷銓服其博洽官會昌
尉廉潔自持服食器用悉取於家

林志

李發字秀實吉水人重和舉特恩赴集英試補鼎州司理叅軍攝黃陂令調零陵正豪民猾吏欺隱田糧二萬五千餘畝移永興通判橫州攝守於賓廣俗誘民童男女易翠羽於蠻中其初一丁值二羽僅半歲掠買至數百人多烹以祭鬼發奏請禁之高宗惻然命焚翠羽自是無敢有以人易羽者胡忠簡公稱其長於吏事三為邑五典郡皆遐方餘地未究其才

吉州人文紀畧

歐陽斗南安福人性質直尚風節時秦檜專政斗南上書言國事伏闕下三日不納斗南退宿旅舍束草為人以書置手中設祭其前鑰門而去後為舍人所首檜怒甚移文夫索不可得

人物志

王大臨字舜輔吉水人建炎中金人南侵父被掠大臨年十

二號泣從行數十里盜欲兵其父大臨抱持痛哭請代羣盜義而免之

林志

羅椿字永年廬陵人楊誠齋高弟累舉進士不第自號就齋作詩有少陵意態如露濕看花脚鶯啼欲曉山春消干嶂雪清偏五湖秋皆佳句也

豫章詩話

彭合廬陵人紹興進士知臨江軍土既瘠而前吏增耗與正額等民苦之合秩滿入對力陳其害由是浮稅悉蠲後為京西總領卒於官子漢老商老

人物志

羅士友字兼善廬陵人早喪父即取諸逋券焚之曰迫人非仁也人有急必賑之旦起盥櫛畢危坐堂中終日不惰倚雖盛寒暑率以為常里之言家法者皆推重羅氏著有史編及諸家詩體

同上

李獻可吉水人年六歲孝宗召入宮試之以詩稱旨帝拊其背曰何不作我家兒命宮女繡御掌於背以賜歸

林志

胡維寧字季懷廬陵人紹興鄉舉閉門著書有易筌蹄詩集

善春秋類例及周官左氏類編傳世

同上

戴之邵字才美安福人紹興間金人南下京西招討使吳珙

以書招之充忠義軍統制給器甲五千之邵植旂南門外

以募忠義日赴者十人遂分五軍與敵屢戰屢勝自鄭州

入西京朝謁諸陵別置永安軍差官供奉諸陵分遣陳孝

恭等收復鄭州密縣等處金人來攻之邵移兵嵩山深谷

中設伏敗之還至襄陽珙勞於郊錄功不受竟歸鹿門孝

宗時特改京官以刑部員外郎將漕西京卒

同上

王琰字季安廬陵人紹興初羣盜旁午遣大將劉紹先攻之

不能下琰身先士卒賊尋滅上功辭不受特准西大饑船

粟千斛以獻丞相李綱聞於朝授安遠主簿不拜未幾廬

陵大饑輸粟千斛以賑

同上

倪師尹泰和人紹興進士為英州獄掾太守周彥輝每引例

以折之師尹曰三尺固存吾安問例嶺南獄具多苟簡師

尹更革損益一以新書從事既卒貧無以歸其同官助之

妻嚴氏泣曰吾夫廉忍累之乎力辭不受

人物志

胡箕字斗南廬陵人官修職郎事親孝父沒免喪櫛衰經於

墓側遇忌日及四時必服以上冢所著有三傳會例孫吳

子注并遺藁三十卷

林志

彭堯輔字道夫廬陵人以蔭授贛州錄事與提刑執辯活非

罪死囚官軍捕茶寇間俘平民堯輔悉平反之進知連州

陞辭論枝江義勇差役興國私鑄上皆嘉納

同上

彭商老字仲伊合長子以蔭官至南安通判嘗以法繩吏致招誣謗而臨政平允持已廉潔卒無毫髮可文致者內外臺皆賢之

同上

項充字德英龍泉人幼承兄洵美訓誨成立以春秋學試上庠當析產充盡以遜兄答其教育之恩知郡王洋上其事詔旌門

同上

彭漢老字季皓商老弟以門蔭累官直祕閣致仕所至多善一政如活瘐死之囚化茶商之盜正綱運侵欺之弊革焚尸敢墓之俗嫁宦族流落之女類皆厚民敦化嘗陞見對三事皆報可又請增戍兵修器械豐儲積補常平亦多施行

人物志

歐陽旻

一作果

字彥昭永新人隆興初任新化主簿嘗著盡心

錄以見志年方壯遽請致仕時宰固留之不可遣之書謂古今所難而獨易爲之高風凜然足以律貪激懦及卒胡忠簡銓志其墓

永新人物志

劉鄂泰和人嘗應詔上書萬言論時事又作邊防龜鑿七十卷太守王佐薦之朝得旨免解歲大旱嘗減價平糴以利人赴人之急勇於必爲

人物志

歐陽彝廬陵人與兄弁奕弁俱有文采時稱四傑胡忠簡銓措置海道彝畫禦戎要策銓奇之其所著憤世嫉邪書尤爲人所傳誦

林志

孫逢吉字從之吉州龍泉人隆興進士就常德教授以歸李燾劉珙鄭伯熊劉焯相繼薦之知萍鄉縣以治最聞除國

子博士兼實錄院檢討官遷祕書郎紹熙二年春二月雷雪交作詔求直言疏八事去蔽諛親講讀伸論駁崇氣節省用度惜名器拔才武飭戎備擢爲右正言建言都城之民安居憚徙宗戚營繕寢廣每建一第撤民居數百咨怨者多時親王方更造樓觀未已聞之亟令罷役在諫垣七十日章二十上詞旨剴切皆人所難言者朱熹在經筵持論切直小人共不便潛激上怒中批與祠逢吉時在講筵吏請曰今日某侍郎輪講以疾告孫侍郎居次請代之逢吉問某侍郎講義安在取觀之則講詩權輿篇刺康公與賢者有始而無終與逐朱熹事相類逢吉欣然代之講因於上前爭論甚苦上曰朱熹言多不可用逢吉曰熹議祧廟與臣不合他所言皆正未見其不可用寔失上意丞相

趙汝愚既罷侂冑專國一日扈從重華宮上行禮畢駕輿扈從者出宮門上馬忽傳呼侂冑至扈從者却入斂板甚恭逢吉不揖而去會部中會食吏密報優人王喜除閤職逢吉即言於上前效朱侂講進趨以儒爲戲者豈可令汙閤職即抗疏力爭之同列密以告侂冑時王喜之命實未出遂以誣詆出知太平州丐祠提舉江州太平宮卒謚獻簡弟逢年逢辰皆有文學行義時稱孫氏三龍

宋史

孫逢辰字會之逢吉弟乾道進士淳熙中茶寇轉掠江西逢辰以贛縣丞督餉乃隨所至易米省饋運十之七八後又上計漕司將袁贛兩州所納油麻隨升斗而折之所少之數悉與蠲免漕奏請得旨兩郡悉蒙其利

林志

羅全略字仲謀廬陵人乾道進士永州司戶叅軍湖南歲饑

當發倉全略單騎入墟落家喻戶曉民被實惠嘗奉檄按
永州白減其租過半掾漕不可全略曰得邦賦失邦本其
患孰急太守從之民曰活我者戶曹也 人物志

胡敬之吉水人與歐陽守道講學白鷺書院歷任修職郎沅
州錄事叅軍除淫祠釋冤獄後以論史彌遠被斥 同上

劉過泰和人自號龍洲道人以詩俠名湖海間周益公聞其
名欲客之門下不就叩閤一書請光宗過重華宮辭意懇
婉聲重一時嘗以書陳恢復方略謂中原可一戰而取用
事者不聽以是落魄無所遇合晚年欲航海抵崑山友人

潘友文留之尋卒

吉州人文紀畧

按劉過字改之江西詩派中一人也其詩名龍洲集近
有偽刻作蘇叔黨斜川集者卒葬崑山城中祠墓至今

尚在安志既列劉過復列劉改之分名字作兩人誤矣

羅維藩字价卿廬陵人乾道進士任保昌尉秩滿入京師極
論二廣煮海改法之弊又作平邊策謂當首甦民瘼興內
治以俟天時 林志

羅克開字達父龍泉人乾道進士宰廣昌有惠愛憲使鄭汝
諧行部邑民遮道借留鄭問知縣何長民雜對曰不愛錢
不苦百姓此其所長也遷大理正同列欲奪巨室沙田歲
入以媚韓侂胄克開力持不可由是出知郴州至州首廢
永豐銀冶還社倉於民移守蘇州青衫手板外惟橘隱集
三卷而已 人物志

張奭字保叔廬陵人以門蔭累官知永州建炎兵餘民多死
徙賦稅罅漏奭白府請檢校冒耕之田實其主名府以新

建武寧二邑命其檢校得實以報下其法於諸邑其賦始均歲饑乃節浮糴鄰得粟十萬石活饑民九萬有奇

林志

胡桀字仲方銓之孫為江西憲楊長孺稱之曰繡衣玉斧威

惠兼施玉虹翠浪又逢賢主蓋用東坡虔州詩以美之也

寧宗朝仕至工部尚書

豫章詩話

李次魚字直卿吉水人紹興鄉舉為長沙酒正博學力行名

其公館曰復齋退食則讀書其中朱晦菴贈以詩曰請看

屏上初爻旨便識名齋用意深張南軒詩曰請君細看復

齋記直到羲爻未畫前觀二公詩其人可知矣

林志

按朱子復齋絕句一首初不言為李直卿作張南軒詩

中所云復齋記亦不詳為何人作姑仍舊志存之

羅晟字伯華龍泉人以蔭授郴州司理有誣平民為盜者言

於郡釋之治新喻請官田以養士治合浦能禦寇不為民

擾人物志

曾光祖字景山安福人淳熙進士仕徽州錄事決讞明敏薦

知新喻逾年而邑大治平居喜著述有禮記精義治功必

致錄行世

林志

張鋼字德堅永新人翬之兄子淳熙進士靜江司戶決滯獄

興水利遷永平令以威愛而化徭徭創浮橋以利湍險教

醫藥以代巫祝既滿將去蠻人相率詣帥守監司乞留後

以宗正知郴州入對言薦舉殿最不公文體士風未正及

州縣侵漁諸軍老弱戰艦蠹弊宮祠泛溢民力彫瘵上皆

嘉納之

永新人物志

楊長孺號東山以父蔭守湖州彈壓豪貴治聲赫然郡之士

江西通志 卷之十一
相與肖像祠於學宮擢經畧廣東以已俸代下戶輸租遷
福建安撫使置強宗累年負租者於法真德秀入朝寧宗
問當今廉吏德秀以長孺對端平間加集英殿修撰致仕
紹定初起判江西增田養士發廩賑荒鄉人德之卒謚文
惠 采豫章詩話改撰

按楊長孺誠齋長子年七十餘致仕家居與雲巢曾無
疑友善往來倡酬時稱其風味不減平園誠齋二老

尹四聰字清陰安福人由進士宣議撫州愛民如子文山嘗
署其居曰高門孫用和有春秋通旨傳於世 林志

按春秋通旨乃四聰之孫用和所著非四聰也人物志
訛原跋

劉南鵬字叔程永豐人新淦縣丞將赴春官憲牒委問清江

疑獄南鵬曰功名輕人命重即變姓名為卜者親抵其地
既廉得真殺人者一人及湖水涸又得被殺之冤骨免無
辜五十餘人後居官所至以寬廉稱 人物志

李如圭吉水人中童子科孝宗召誦尚書如圭即誦無逸篇
帝喜撫榻和誦至終明日賜宴以父在賜珠簾隔之後登

進士官至福建安撫 林志

蕭麟字耕道廬陵人開禧進士知仁化縣教民為水車救旱
之具為民奏田缺賦存之害卒於官民肖像祀焉 同上

胡洪範吉水人國學生因星變應詔上書論賈似道專權誤
國似道怒欲置之死丞相江萬里抗疏力救獲免家居憂
憤成疾卒 人物志

伍瑞厚字伯謹安福人事父母以孝著部使者聞之朝賜號

孝節處士 林志

左暮字元規永新人開禧進士使金不辱命錄國子大得士
心廉察黃岡沿江要地城堡完固未及召而沒民立祠祭
之所著有坦齋藁 永新人物志

周雲字從龍吉水人以詩古文受知於益國周必大開禧間
真德秀奉使辟掌箋奏授行在同知主管樞密府機宜文
字領兵北歸調荆襄累有功擢廣西兵馬鈐轄二親喪即
以所居立院守其墓 吉水縣志

龍升之永新人嘉定鄉舉陳愷帥九江禮聘任以事遂建城
永新之議奏名調臨川戶曹預修中興政要書成除福建
節幹在幕修帝學增釋二百卷 人物志

歐陽守道字公權吉州人少孤貧無師自力於學里人聘為

子弟師主人瞰其每食舍肉密歸遺母為設二器馳送乃
肯肉食年未三十翕然以德行為鄉郡儒宗淳祐元年舉
進士授雩都主簿丁母憂服除調贛州司戶江萬里作白
鷺洲書院首致守道為諸生講說湖南轉運副使吳子良
聘守道為嶽麓書院副山長萬里入為國子祭酒薦為史
館檢閱召試館職授祕書省正字遷校書郎改景憲府教
授遷祕書郎以言罷守道徒步出錢塘門唯書兩篋而已
咸淳三年詔大臣舉賢才少傅呂文德舉九十六人守道
預焉添差通判建昌軍遷著作佐郎兼崇政殿說書兼權
都官郎中經筵所進皆切於當世務遷著作郎卒 宋史

按守道初名巽後以應舉更名自號巽齋吉州人文紀
謂文宋瑞鄧中義劉會孟皆出其門文山嘗言先生之

學如布帛菽粟求為有益於世用而不為高談虛語以自標置於一時蓋實錄云 原跋

王洋字大猷龍泉人特奏名調英州推官行義修飭長於文字尤昌於詩自經史百氏下至稗官小說皆采英華以資詩歌之用故詞富才瞻律老法嚴 林志

王伯芻字駒文廬陵人博洽工文辭日夜校讎箋註經史凡前賢世系出處必推見本末家故貧一介不取諸人楊萬里目為淮海文士 同上

胡夢昱字季昭吉水人嘉定進士官大理評事傳國璽來歸羣臣皆遷官夢昱獨辭不受尋以星變言禍機者五事及雲川之變濟王死史彌遠窮治其獄轉相誣引夢昱上書反復言濟邸之不幸其事與管蔡秦邸不同乞隆追贈褒

崇之典降存亡繼絕之詔又遺書詰責彌遠彌遠大怒於是御史李知孝梁成大迎合風旨劾夢昱編管象州以疾卒夢昱一門孝友弟利用從編管象州死兄夢白昇喪歸又死端平元年御史王遂言夢昱仗節仗義之風足以寒亂賊之膽上亦追悼詔贈朝奉郎謚忠節 豫章書

按科目考胡夢昱嘉定丁丑吳潛榜進士豫章書訛作夢旦今改正又按詩話季昭之兄子才亦名賓皆博學能文友愛最篤得罪之日囊無一錢子才學家歸賣文自活國賓徒步從其兄至貶所國賓先死季昭繼之端平初詔許歸葬云云夢白即子建利用即國賓也又林志載有胡夢虎字叔炳者紹定進士上書論賈似道所至有政聲 原跋

周必彊字子柔益國公必大之弟剛明孝友為詩文皆驚人語真文忠嘗題其集曰假之以年必將追騷人而與游望聖門而力進矣

林志

劉元剛字南夫吉水人嘉定進士官韶州守真德秀見其文亟稱之理宗嘗立貪廉二碑元剛居廉碑第四所著有孝經論語孟子衍義容齋雜著等書

同上

左師召永新人嘉慶進士守新州始終廉潔却船貢不收委公俸不取秩滿致仕去

同上

朱渙字約齋廬陵人文信國受業師嘉定中進士任大理寺丞知衡州文章政事名重一時

人物志

劉奎字幼文泰和人由進士官濠州通判平寧鄉時寇逼潭城制帥以軍餉不給告奎以縣帑千緡上之為諸邑倡治

行表著臺省交薦以賢能名

同上

左譽暮族弟紹定進士為景陵尉北兵陷城被執與母妻子同時遇害贈員外郎命建祠岳陽

吉州正氣錄

按豫章書賜祠額憫忠贈承事郎與此不同紹定誤紹興從登科錄改正

黃登吉水人紹定進士主管制司機宜文字援筆立成夜有謀變者或以告登堅卧不動翌日坐廳事以他事召之誅其首餘悉不問一軍乃安

林志

周寅龍字澤之吉水人紹定間擢博學宏詞以言忤時宰引疾不起經書根極要領文章華縟一時傳誦取法焉門人私謚曰恭文

同上

江文卿永新人端平間其母病革不可療文卿剖股和藥進

之病遂愈邑令以聞旌表其門 永新人物志

龍森永新人嘉熙間以所著春秋三傳評續南唐書進授登

仕郎誥詞以孫明復劉道原褒之族子崇字邦之出真西

山之門以薦預修中興政要 同上

劉子澄字清叔秦和人知棗陽後較畫史匡軍事為賈似道

所忌劉將孫稱其有史才所著有玉淵集平淮疏補史行

於世 林志

文儀字士表廬陵人丞相文山父也氣質端重進止有尺寸

讀書夜以繼日每有所鈔錄揮汗呵凍弗輟故學博而文

多可傳人稱為篤志君子 同上

王元孫字伯初吉水人理宗朝皇嗣未定元孫年十七伏闕

上書乞立忠王榘為儲嗣朝旨授樞密院校勘自是臺端

皆以忠王言卒正儲位度宗莅阼欲加恩典元孫竟致事

以歸 同上

曾如驥字德稱泰和人淳祐進士官寶慶通判值長沙失守

謀者咸謂降足自保驥曰吾安忍為身謀誓與此城俱存

亡既知不可為遂書舍生取義章於郡齋壁上投澧江死

景炎元年贈敷文閣侍制謚忠愍 吉州正氣錄

按忠愍死事始末詳見羅念菴寶慶祠祀及尹洞山祠

堂碑中

劉芳遠安福人嘗為澄邁縣尹棄官歸數年海南寇亂州郡

莫能制縣民走安福迎之芳遠奮然曰民故吾民也吾不

忍其橫罹暴亂乃往率縣人與賊戰近郊以寡援死 林志

文天祥字宋瑞廬陵人寶祐進士第一簽書寧海軍元師侵

江西通志 卷七十一 人物

宋內都知董宋臣主遷幸議天祥上書乞斬宋臣以一人
心後宋臣復入又上書極言其罪不報賈似道乞致仕天
祥爲玉牒檢討當制知其志在要君裁之以義內制相承
皆呈橐天祥獨不呈遂忤似道乃援錢若水例致仕咸淳十
年起知贛州德祐初元師渡江詔諸路勤王天祥捧詔涕
泣發郡中豪傑萬人遂入衛時朝議方賴呂師孟呂文德
以求好天祥上疏乞斬師孟釁鼓以作將士之氣不報出
守平江至則元兵已下金陵入常州矣天祥命其將率贛
兵三千與張全往援常將士殊死戰張全擁兵不救贛兵
悉死之明年除知臨安府尋拜右丞相有旨令詣北軍請
和旣至伯顏折以危言天祥曰天祥爲宋狀元宰相所欠
只一死報國耳刀鋸鼎鑊非所懼也明日吳堅賈餘慶等

奉降表至天祥大罵其賣國且責伯顏失信伯顏挾天祥
北行中道以計脫歸崎嶇真揚聞自高郵泛海至温州上
表勸進晉左丞相仍以都督出江西與元兵戰於贛州汀
州間及空坑之敗乃入海訪問車駕益王昀衛王繼立
乞移軍入朝陸秀夫張世傑阻之加少保與信國公天祥
收殘兵由循州駐南嶺元將張弘範兵至衆不及戰天
祥倉皇出走爲千戶王惟義所執厓山破軍中置酒大會
弘範勸之降天祥泣曰國亡不能救死有餘罪況敢有二
心乎弘範義之遣使護送入燕拘兵馬司者四年有王績
翁者欲合謝昌元等十人請釋天祥爲道士留夢炎不可
遂已至元十九年世祖召入問曰汝何願天祥對願賜一
死臨刑從容謂吏卒曰吾事畢矣南鄉拜而死其妻歐陽

氏收其尸衣帶中有贊云孔曰成仁孟曰取義惟其義盡是以仁至讀聖賢書所學何事而今而後庶幾無愧時年四十七元初謚忠武明景泰中改謚忠烈 白志

按文信國傳宋史雕本年久模糊字多漫滅無他本校勘白志據林志詮次增益與弘簡錄中所載合今仍之文天禎廬陵人丞相兄也寶祐間鄉舉署廣濟學諭造士有方士風丕變宋亡丞相死節天禎不仕寓濟之五里橋東家世業儒迄今未艾 湖廣流寓志

按前志舊有文璧傳吾汶集云帝昺戊寅文山以樞密開府惠潮璧以戶部侍郎任惠州是冬元兵入廣文山被執不屈而璧以流降文山執後繫頸繫手足備極艱苦而璧以... 文山不屈囚燕獄者四年

璧以郡守入覲亦至燕文山詩云兄弟一囚一騎馬同父同母不同天使人扼腕此豈可混列人物今特削去天禎入元高遜同氣薰蕕之異如此從前諸志俱不載今采補

鄒鳳字鳳叔吉水人後徙永豐少慷慨有大志從文天祥勤王補武資至將軍益王立領江西招諭副使聚兵寧都復興國永豐二縣進兵部侍郎兼江東西處置副使及永豐敗從天祥間關嶺道未幾復出開督府分司永豐興國境上北兵驟至大戰鳳脫身走潮州及天祥被執鳳自殺當是時從天祥勤王死事者鳳與劉子俊等凡十九人 宋史

劉沐字淵伯廬陵人文天祥鄰曲也少相狎暱天祥好奕與沐對奕窮思忘日夜以為常及起兵辟補宣教郎督府機

宜暨天祥出使沐領兵還天祥歸開府南劍沐收部曲來會改授太府寺簿專將一軍為督府親衛會空坑兵敗被執至豫章父子同日死焉仲子死亂兵季子復從天祥死嶺南當時江西忠義皆沐所號召沐性沈實而圓機晝夜應酬疊疊不倦云 同上

孫臬字實甫吉州龍泉人獻簡公抃之後天祥長妹壻也天祥起兵檄臬招忠義士補宣教郎帶行監官告院知吉州龍泉縣天祥擁兵出贛里人奉臬復龍泉拒守不下尋為叛者所陷執至隆興殺之 同上

蕭明哲字元甫泰和人性剛有膽氣明大節少舉進士天祥開府汀州辟充督幹架閣監軍師出嶺明哲以贛縣義民復萬安連結諸砦拒守兵敗被執不屈死於隆興臨刑大

罵不絕口聞者壯之 同上

蕭燾夫永新人與兄敬夫俱天祥客燾夫為詩有豪俊氣天祥起兵補從仕郎及彭震龍謀復其縣燾夫贊之縣受屠兄弟俱死之 同上

彭震龍字雷可永新人天祥次妹壻也天祥起兵補宣教郎帶行大社令知永新縣會天祥出使被執震龍遁歸吉州已失乃結峒獠起兵天祥兵出嶺震龍接應復永新大兵至震龍為親黨所執至帥府要斬之屠永新 同上

張履翁顏斯理俱永新人與彭震龍同舉義兵歃血城守值元兵突至有劉磐者為內應城遂破磐亦永新人素無行義至是屠城以快私憤三人被執不屈同時死之里人至今稱三姓為勤王忠義之家 林志

按正氣錄斯理作斯立

劉士昭泰和人嘗為鍼工與鄉人同謀復泰和縣兵敗血指書帛云生為宋民死為宋鬼赤心報國一死而已因以其帛自縊死其黨入獄多乞憐苟免有王士敏者獨慷慨不撓題其裾此生無復望生還一死都歸談笑間大地盡為腥血汙好收吾骨首陽山臨刑歎曰恨吾病失聲不能大罵耳

宋史

按王士敏亦泰和人正氣錄訛王作黃應從史

劉子薦字貢伯吉州安福人父夢驥以進士歷官知澧州沒於王事子薦以父任為湘鄉尉調撫州司錄有愬王應亨毆死荷擔黃九者獄成矣子薦閱爰書疑而駁之俄烈風迅雷闢獄戶裂吏楔殺人者實孔目馮汝能非應亨也獄

遂白得免死者八人改知贛縣監行在左藏庫通判常德府知融州至官以廉靜著聞主管都觀廣西經略司檄為叅議官德祐二年北兵至靜江權經略使馬堅遣子薦提瑤兵藥弩手守城東門勢不克守國公已入燕子薦取笏書其上云我頭可斷膝不可屈金城北望再拜取所衣袍瘞之語左右曰事急不可為吾惟以死守或諷子薦遁去子薦曰死事義也何以遁為竟死之

同上

劉子俊字民章廬陵人嘗中漕試少與文天祥同里閑相友善天祥開督府興國子俊詣府計事補宣教郎帶行軍器監簿兼督府機宜空坑兵敗子俊收兵保洞源接應郡縣尋入廣與元兵遇戰敗復招集散亡與鄒瀾同趨潮州天祥兵敗子俊被執自詭為天祥意使大兵不窮追天祥可

間走也未幾別隊執天祥至相遇於途各爭真贋至大將前始得其實乃烹子俊同上

按子俊死節史傳昭然林志以為莫知所終何其謬耶羅開禮字正甫永豐人袁州教授江上兵起文丞相辟知永豐倡義以仗大節連兵鄒瀉駐師永豐深溝固壘蓄養銳士攻吉安南贛南雄大捷響應垂下臨洪忽吉贛軍潰元李恒兵又自隆興來乘勝追及空坑丞相幸脫恒大索開禮開禮隱巖中執囚吉安不屈八日不食而死丞相為制服慟哭祭之林志

張雲吉州人嘗為敢勇將文天祥師入衛雲隸麾下及天祥以使命被執雲引兵自婺建劔汀取道歸時吉州已降雲謀興復夜襲元兵殺傷相當質明猶戰渴赴水死明一統志

劉欽吉水人鄉貢士有風節上下今古健於議論行府至汀欽來就招諭使鄒瀉北軍奄至死於亂兵同死者鞠華叔顏斯立顏巖皆吉之豪傑吉州正氣錄

按林志有鞠華叔無劉欽府志所載二顏一名斯理一名起巖與正氣錄互異兩存之以俟考

張瑛張珩皆吉水人周貧三十餘年丞相募義士勤王瑛兄弟從募俱死於兵林志

錢申叟名淵龍吉水人文丞相勤王以申叟為招討副使率兵復泰和會元帥李恒遣偏師至力戰鍾步與弟翔龍同日死之丞相被執北行過戰場為文以祭之同上

吳希奭安福人文丞相起兵奭自以名通於督府聚眾數千復袁州萍鄉與北兵會據險待命以眾寡不敵一門三十

口俱死 吉州正氣錄

胡文可字可山泰和人有謀畧便騎射文丞相起兵文可從之叅謀禮為上賓先一夕丞相夢火明日文可緋衣謁軍門與語喜曰殆天以賚我耶為更名夢炎丞相敗文可亦被執脫歸後集兵赴難而死其弟文靜先授提督時無敢拒北兵者拒即屠而泰和已下乃招致文靜不屈曰寧死不負趙氏竟死之而一家屠 府志

按前志載文可脫歸後卒於家與此不合其弟文靜之死及胡氏闔門殉難事失載今改補

金應吉水人以筆札往來文丞相門下二十年從丞相勤王授兵馬都監丞相被執左右皆散應上下相隨更歷艱難奔波數千里及脫走鎮江以憂憤死 吉州正氣錄

易相廬陵人官直學士安撫使從勤王復吉贛駐師廬陵旬日間敗於方固石下死之 林志

鍾寅廬陵人文丞相空坑兵敗與劉欽等合戰死之 同上

劉伯文字政平吉水人以武舉賜第從文丞相勤王景炎二年督府駐興國文伯受檄結約遠近至袁州仰山廟為巡兵所執搜其行李得文書甚多伯文慷慨自引一不以累人獨斬於市家屬徙燕 吉州正氣錄

劉應登字堯咨安福人景定間漕貢進士宋社將危隱居不仕其為文出入經史劉須溪趙青山交推許之所著有耘廬集詩經訓註杜詩句解行於世 林志

李應革字式夫吉水人寶祐進士為崇政殿說書時吉郡大饑經筵講罷上從容問應革鄉里革以饑對上惻然不日

減糴應革復取建隆紹興乾道賑饑故事反復陳於上前
上爲之感動捐粟十萬以賑饑人賴以全活家書應革姓
號官爵祀之同上

梁和叔龍泉人咸淳盜起集義兵保障鄉里後文丞相領兵
討賊和叔傾貲運餉賊平丞相曰此非吾之能乃汝之功
也同上

羅椅字子遠廬陵人寶祐進士清修博學時賈似道專國上
書力詆其罪挂冠徑去不復仕同上

應鳳字克舉安福人咸淳癸酉鄉試明年對大廷以言忤時
相寘第五授簽判元兵逼江南嘗署建昌郡事以時事日
非遂隱去以文自娛然好尚莊子戰國策故人謂其文有
霸氣文丞相被執應鳳過王鼎翁對牀賦詩憫之有天留

中子墳孤竹誰向西山飯伯夸之句吉州人文紀略

鄧光薦字中父廬陵人文丞相門友也少負奇氣以詩名世
登進士第江萬里屢薦不就後客文氏贊募勤王挈家入
閩一門十二口同時死賊火中乃隨駕厓山不數日厓山
潰光薦赴海者再輾轉不死敵人殺出之元帥張弘範改
容以待後同文丞相送燕京至建康因丞相於驛中而寓
光薦於天慶觀得從黃冠歸丞相賦詩三章送別丞相嘗
與其弟書曰鄧先生真知吾心者吾銘當以屬之林志

周焱吉水人寶祐進士官南昌知縣宋亡誓不復仕閉門著
書以娛老有通鑑論斷四書衍義行於世同上

楊叔方吉水人博通經史天文曆數尤極研精著五經辨曆
法五行論在太學與諸生上書斥賈似道之奸四方學者

爭造其門以經學授清江范德機以曆法授寧都習吉翁
習曆至今用之同上

陳應乙吉水人公安縣尉因忤賈似道乞歸後從文丞相勤
王有功同上

王炎午原名鼎翁別號梅邊學者稱梅邊先生宋敷文閣瀘
溪先生之諸孫也自幼力學業春秋升太學上舍生與丞
相文公青山趙公同游宋亡文丞相募兵勤王鼎翁謁軍
門諭丞相毀家產供給軍餉以倡士民助義之心請購淮
卒叅錯戎行以訓江廣為合之衆丞相嘉納目為小范老
子欲授職從戎以母疾不果及丞相被執為生祭文以祭
丞相鼎翁自以太學舊生世移運改遂終身不仕奉母至
孝三十年不懈母沒廬墓三年靈龕設遺像嘗以喪事宿

邑城夢母謂曰夜來侍婢不謹火吾衣幾及吾面旦急趨
至家謁遺像果夢之夕為跋燭所藝及面不止由是家居
跡不至外境所著有吾汶稿揭曼碩歐陽圭齋有序白志

龍震翁泰和人性孝母歿未葬山寇焚掠火其居震翁倉皇
無計夫妻俱抱柩死死處有枯梅明年六月作花事問理
宗旌其門曰孝梅里又御製詩曰南風六月吐梅花奇絕
西昌孝子家一點落英千古月夜來啼殺後棲鴉忠孝錄

康夢吉字叔誼龍泉人在太學時不遊湖山不謁貴近賈似
道欲授館力辭時人比之陳后山登咸淳進士任撫州教
授嚴程試舉鄉射士譽翕然尋以宋亡棄官不任人物志

王泰來字太初廬陵人父兄俱仕宋延賞弗及試藝屢屈晚
值世變既貧且病而詩愈工劉會孟每稱其師王太初詩

為廬陵八邑之冠

吳草廬大酉山白雲集序

劉觥永豐人咸淳進士素以節義自許元兵入臨安三宮北

遷觥撫膺大慟既聞益王即位于福州乃徒步至行在從

文丞相勤王授軍前計議後與元兵戰歿于陣

邑志

蕭資吉水人丞相幕下書吏通文墨丞相入廣資于患難中

扶持甚至及空坊兵敗護衛太夫人全督府印有功潮陽

移屯與元兵遇死之

吉州正氣錄

劉辰翁字會孟廬陵人補太學生壬戌廷試賈似道專國欲

殺直臣以塞言路辰翁因言濟邸無後可慟忠良戕害可

傷風節不競可憾雖忤賈意而理宗嘉之寘丙第以親老

請濂溪書院山長江萬里陳宜中薦居史館除太學博士

皆固辭宋亡託方外以歸子尚友亦能文有須溪集

林志

劉友益永新人清江公非先生九世孫居貧力學嘗傭書於

人以給膏火鈔綴講習凡經傳子史天文地志律曆象數

靡不淹貫為人內剛木而外疏通練達世務宋季杜門不

與世接世稱水窗先生八十五卒揭傒斯銘其墓積勤三

十餘年著通鑑綱目書法五十九卷

人志

周京字伯寬吉水人咸淳解試直寶謨閣書紙斥賈似道

棄官歸元初屢徵不起著有五經纂史漢音辨等書

同上

張千載字毅甫廬陵人與文天祥友天祥貴時屢辟不出及

天祥被執北上過吉州千載涕出相見曰丞相往千載亦

往往即寓天祥囚所近側三年供送飲食無缺又密造一

櫝天祥授命日即藏其首負骸南歸付其家安葬

輟耕錄

王介字文卿吉水人咸淳進士授邵陽主簿談經論道各極

旨趣致仕歸聚徒講學於山堂書院學者稱山堂先生林志
 嚴肅字左方號朴山泰和人著朴山易說十四卷咸淳中丞
 相馬廷鸞江萬里上其書徵為祕書省校勘數月即自免
 去曰吾豈以榮名自嬰哉旋以疾終人物志

劉應誠字信道永新人家窶甚形家或勸改葬應誠泣曰寧
 窶死忍就坏土徼福耶居亡何朱草產塋畔家益昌安志
 胡幼黃字成玉永新人元龜四世孫咸淳甲戌進士第三人
 授節度推官未上而宋亡退居山中創讀書樓日呻諷其
 中元世祖用留夢炎等議令所在搜求宋遺士以聞同榜
 狀元王龍澤起為監察御史獨幼黃邀進士豫章熊朋來
 安成劉應鳳皆避匿不出應命時論避之吉州人文紀畧
 趙文字惟恭又字儀可廬陵人三貢於鄉仕南雄府教授與

弟彊同出文丞相之門嘗從勤王於軍政多所叅決彊死
 於軍中文請歸養所著有青山集林志

解禧字公和吉水人知豐城增築新堤水不為災以薦擢知
 賀州陞辭陳二事曰君德曰役法朝論嘉之縣志

劉南甫吉水人嘉熙進士嘗講學白鷺書院歷安遠縣簿去
 淫祠治冤獄民至今祀之同上

文應麟丞相從孫倜儻尚志節景定中丞相弟璧守惠州應
 麟與之偕屢勸璧修城堞建樓櫓積芻茭糧儲以嚴守備
 璧易其言及元兵至竟以城降應麟耻之攜二子起南遷
 于東莞之東渚遂家焉廣東流寓志

羅公升字時翁永豐人大父開禮號水心翁公升少有才略
 以軍功授本邑尉傷大父死節傾資北遊燕趙與宋宗室

趙孟榮諸公圖復宋祚知勢不可爲回經錢塘江作弔胥
濤賦以自寓今載集中餘詩亦多感憤語公升有弟宋亡
亦不仕元父死於寇廬墓號泣不御酒食肉者七年蓋孝
義萃於一堂云所著有石初集 元無名氏滄洲翁傳

王幼孫字季稚廬陵人性篤孝母劉疾苦痰醫莫之治一日
夢南陽活人書或投甘桔湯良覺如夢立愈寶祐丙辰赴
闕上書言國事餘萬言不報歸教授於鄉宋亡其友文丞
相兵敗執以歸過廬陵謁於驛舍爲文祭之期以必死辭
氣慷慨左右嗚咽莫能仰視自是日與賓客過從守經執
禮以終年七十六所著有中庸大學章句二卷太極圖說
擬答朱陸辨深衣圖辨經籍論易通貫三爲一圖家傳譜
系簡便經驗二方各一卷雜著若干卷 程雪樓集

康應弼字輔德龍泉人平生精力於詩所著有淳祐藁寶祐
藁開慶藁景定藁同時詩人如呂耐軒李義山李蒙泉徐
矩山姚雪坡諸公皆有倡和題跋其子同老合而命之曰
澹軒康氏詩藁 吳草廬集

按草廬原文矩山徐經孫雪坡姚勉止菴林實夫芸庄
蕭澥冰匡蕭立之俱有題跋而前志誤作徐雪坡姪止
菴謬甚今改正

元

劉詵字桂翁廬陵人性穎悟幼失父知自樹立年十二作爲
科場律賦論策之文蔚然有老成氣象宋之遺老鉅公一
見即以斯文之任期之旣冠重厚醇雅素以師道自居教
學者有法聲譽日隆江南行御史臺屢以教官館職遺逸

薦皆不報詵為文根柢六經躡躒諸子百家融液今古而不露其踔厲風發之狀四方求文者日至於門其所為詩文曰桂隱集桂隱詵所號也至正十年卒年八十三 元史

按詵字桂翁廬陵人劉鶚祖叔正字桂林永豐人前志以桂林即桂翁謂詵即鶚之祖殊混謬今駁正

鍾過字改之永豐人其學源本六經動循古昔為文精深渾灝著述甚富今性理之書多采其言吳草廬跋其詩云未冠時聞改之先生為世名儒今見先生所著書深嘆斯人之不可復見也 邑志

曾德裕字小軒永豐人歷翰林直學士提調考功文書時考功法久廢德裕乃詳覈掌故勒成曆式二卷官屬皆受成焉弟巽申字亦軒至元初著鹵簿圖郊祀禮樂圖以進命

為大樂署丞後除編修復推廣舊說繪中道外仗二圖并書十卷藏祕府英宗祀太室取祕府圖書覽之稱善擢為應奉翰林文字兄弟所著名玉堂倡和集 白志

吳鄴永新人原名張應珍宋末兵亂避仇轉徙山西元駙馬都尉高唐郡王闊里吉思嘗從之質疑刊其書於平陽路應珍以至元中由從事郎歷祕書監丞大德八年遷祕書少監九年乃更姓名曰吳鄴元祕書監志卷中題名有張應珍其人吉志附之宋遺民之列非也 同上

馬佐順吉水人隱居著述知州白璧稱其有顏閔之行賈董之才以所著書進英宗覽之賜名寶範授南雄路判 林志

周南瑞安福人博學清操銳意古學與草廬吳澄相友善多所講辨所著有江西老圃集 同上

楊準字公平泰和人履行修潔嘗從學吳文正公澄文章高古甚為虞道園歐陽圭齋所推許危太朴尤敬服之時修宋遼金三史歐陽諸公薦之不就號玉華居士

人物志

王迪吉字浩吾泰和人通五經卓然為鄉鉅儒出其門者皆博碩之士國子司業劉子高贊云五經堂堂學者仰衣冠

襜襜德之望

林志

王留孫字宜遠安成人奉母至孝三十年不懈父疾晝夜扶持衣不解帶者二年父沒既葬結草如繭寢處墓側哀至悲泣苦草為腐服闋猶不食醯漿蔬果里人表其阡曰白華所居曰永思

歐陽圭齋集

黃瑞節字觀樂安福人力學精思嘗萃太極圖通書西銘易啓蒙家禮諸書并加釋註題曰朱子成書

林志

龍仁夫字觀復永新人博學好古探濂洛之旨經傳子史陰陽曆律無不精究所著有讀書臺集周易集傳十八卷學者稱麟洲先生

豫章書

楊景行字賢可太和州人延祐進士授會昌州判官會昌民素不知井飲汲於河流故多疾癘不知陶瓦以茅覆屋故多火災景行教民穿井以飲陶瓦以代茅茨豪民十人號十虎干政害民悉捕寘之法調永新州判官奉命覈民田租除剗宿弊奸欺不容轉宜黃縣尹理白寃獄之不決者數十事陞撫州路總管府推官金谿縣民陶甲厚積而兇險屢誣陷其縣長吏罷去之暴橫於一郡景行至以法痛繩之徙五百里外豪僧雲住發人冢墓取財物事覺官吏受賄緩其獄景行治之如法由是豪猾屏迹良民獲安轉

湖州路歸安縣所歷皆有惠政既去民皆立石頌之以翰
林待制朝列大夫致仕年七十四卒 元史

解觀我名子尚入試名觀吉水人幼警敏嗜學自天文地理
兵刑曆律靡不精究尤深於易著宋書一千卷天文星曆
一卷地理若干卷衍八陣圖注武經刑書攷一卷作萬分
曆推步如神作儒家博要四書大義周易義疑通釋行於
世天曆已巳與弟蒙俱中江西鄉試上春官不合吳文正
公以宋史屬之翰林典籍危素奉詔起修三史觀上書其
畧曰遼與本朝不相涉又其事已具五代史雖不論可也
所當論者宋與本朝而已而所以定二國之統者蓋有四
說焉一曰明國朝之大體二曰稽先哲之成法三曰證時
賢之確論四曰審事變之微權蓋金之興既在宋後其亡

又在宋前宋統始終自當屬於皇元誠以此說而勸命之
正宋統以槩舉遼金公議表著人心壓服永有辭於萬世
矣時任事者多右金統書上大將徑寧孫近虎邱山建東
山書院於金釵嶺扁曰麗澤齋以金之亡宋之亡者甚眾弟蒙
字來我所著有易經精義 春官

解子元字真我吉水人延祐進士 正間兵亂募
眾保障為寇所圍與義士羅啓南等天祐方戰同日死 吉
州正氣錄

高若鳳字在翁吉水人至治進士累官知封州興學卹民練
軍養士會連城有寇警若鳳領兵收捕單騎抵賊穴諭之
賊皆感泣羅拜解去 人物志

王繼遠安福人早負氣節至治間以薦授郎官沒於陣事聞

贈總管諡忠愍廟祀南海 吉州正氣錄

馮翼翁字子羽弟獎翁字子將幼受學於父魯山先生兄弟繼領延祐鄉貢表所居坊為雙桂翼翁授漢陽縣丞歷官撫州守於經有春秋集解大義士禮考正性理羣書十七卷於史有通鑑小錄考索類要正統五德類要三十四卷於子傳有古書正偽讀書纂要法家源流異政錄十一卷於文章則合古 文漢韓柳歐蘇八家為文章旨要八卷自撰集又二 卷翼翁未第而終亦以學問與兄齊名廬陵劉岳申志其墓謂永新以三馮瑞其鄉云 永新人物志

陳奐彰永新人學書經元末隱白雲峰吟誦自樂有詩集學者稱古春先生 同上

張光遠原名遠以字行永豐人元季盜起沔陽蔓延江右陷

吉安光遠思建奇策翦寇其友羅維遠者尚氣節遣人告之曰吾州素號文物之邦一旦遭盜蹂踐將無遺義不與賊俱生然非公不足濟我事今郡守梁使君出督兵境上公宜往請師吾陰立部署以之斫賊無難者議既定未發寇諜知之帥眾執羅去裸而鞭之且授紙筆使寫首謀者名羅瞋目視之大書一死字賊反接羅於樹剖其腹作小竅日增加之羅嚼齒大詈三日而後氣絕光遠脫走吉水勢稍戢還故里寇有知遣羅事者繫之至營從容語賊曰我纓綬之家決不畏死遂遇害子唯流寓河南以尚書中鄉試第官編修丐宋潛溪銘墓著文節 吉州人文紀畧

宋景濂曰嗚呼士氣弗振久矣當楚氛膠葛之時為二千石者曾不一舉手障之寇至輒俯首遁去日行百里

惟恐不疾有如君者藐然一布衣無社稷人民之寄乃能建策殺賊不幸事不成雖肝腦塗地而不悔豈非烈丈夫也哉羅氏能從君謀身可殺而志不可奪亦可謂慷慨之士取友之端又於君見之

彭絲字曾叔安福人博學貫穿諸家尤精律呂之學所著有黃鍾律說八篇禮記集說四十九卷庖易春秋辨疑等書

林志

彭復初安福人精於易範嘗本朱邵之說著易學源流一時名士多出其門

同上

劉諤字公榮泰和人涉獵羣書大肆力於文章嘗作省身八箴示學者作善惡二箴以自省易箴之日朗誦朱子小學題辭一過而卒

豫章書

許天箎字時翁吉水人有易象圖說理學同異行於世

林志

李心原吉水人師事吳澄通五經確守朱子之學尤善推演

其說

同上

黃琢字玉潤吉水人以春秋教授鄉里有春秋舉要行世

同上

楊舟字道濟吉水人授詩學於謝南窗

同上

劉鶚字楚奇永豐人皇慶中以薦授揚州學官至翰林修撰紅巾賊起擢江州總管改瑞州陞廉州使守韶六年屢却強寇後分兵討獠峒贛寇數萬猝至力盡城陷被執不食而終嘗建浮雲道院以教鄉族子弟學者稱爲浮雲先生子運字尊元元帥府經歷同父討賊死

同上

按吳草廬及歐陽圭齋所撰劉鶚詩序皆稱其大父桂

江西北通志 卷之十一
林翁年一百二為鶚作序祖壽而德孫少而才為一家
二瑞且以鶚為廬陵人林志云永豐所當依序改正者
也又楊東里集稱鶚官江西叅政與此亦不同所著有
惟實集八卷林志失載 原跋

周聞孫字以立吉水人以鄉貢教授袁州沔寇至聞孫倡舉
義兵為郡捍禦城遂以完著河圖洛書序說書經一覽五
經纂要學詩舟楫等行於世 人物志

劉岳申字高仲吉水人為遼陽儒學副提舉以泰和州判致
仕其文辭簡約峻潔甚為吳澄虞集所推重學者稱申齋
先生 同上

按吉安府志劉所著有申齋集今不傳

周志遠吉水人以危素薦授太子說書一日得母書召其歸

飄然南去志遠生於元仕於元然其心若有不自得者嘗
自贊其像曰十年塵土變形容惟有丹心日月同北海子
卿羝不乳未應已在畫圖中 林志

王仕政字小隱萬安人泰定進士除信豐主簿專務以德化
民不尚刑辟改會昌猶治信豐民咸德之 人物志

尹希善吉水人被薦授荆湖儒學提舉改宣城令有善政以
病卒於官民哭之曰公來何其遲公去何其速使我宣城
民何以遂生育 林志

蕭志仁字無惡廬陵人學於其兄無咎淵博文雅著有論藁
十卷詩四卷經解佩觿錄十卷行於世史評講義雜著三
十卷藏於家 人物志

劉瑾安福人博通經史隱居不仕所著有詩傳通釋 林志

姚正叔安福人盜起率鄉閭擊之數年諸賊不能逞志至正乙未袁賊悉銳直抵砦下正叔率所部力戰至不能支舉旗招援時監普刺同知擁兵不救父子孫三代俱死賊遂蟠踞姚所居州東小橋頭周石初弔之詩曰吾州姚氏城東營四年殺賊不為名一門忠義死相繼報國何重身何輕無端毒蛇生肘腋噓送黑雲朝蔽日條鷹咫尺呼不來瞬息東藩失堅壁老姚忠血赤貫天江南野史何人傳殞身三世匪官守異日合置忠臣先郡兵不來思蓄銳羣賊憑城轉無忌請看婦女與兒童說著姚家總垂淚

氣錄

吉州正

劉聞字聞庭安福人天曆進士官太常博士帝祀南郊告祭太廟至寧宗室曰朕寧宗兄也當拜否聞對曰春秋魯閔

公弟也僖公兄也祖廟之祭未聞僖公不拜帝乃拜擢為翰林編修宋史成進修撰著有春秋通旨容齋文集

志

人物

夏日孜字仲善吉水人舉天曆進士授從仕郎南康路建昌州改授徵事郎興國路錄事再調紹興路會稽縣尹其在建昌州有三陂界南昌新建間可溉田若干頃廢且久民以旱告日孜相度形便適復其利興國地僻俗陋日孜撫以安靜首贊郡庠確範金石創置大成樂修城東堤三百餘丈周樹以柳舟航聚落隱為一郡勝槩會稽為浙東壯縣君至驗糧賦為高下仍歲籍之使無竄易為奸縣口食鹽課先時率侵於私鬻君設法置局歲周課完無有侵漏山陰富室徐某嘗以私怨殺人沈尸於海又讐異母弟誣

以偽造楮幣而幽之使不得自白推官貢師泰委日孜治其狀收捕窮詰竟按其罪於是遠近震伏邑以大治始修孔子廟繼修夏禹廟修南鎮廟又修馬太守祠尋以母病去官卒年四十有四 劉職方集

聶以道吉水人官江華縣尹興學校勸農桑復流民三百戶墾良田千餘頃歸旁民詭寄徭獠不犯其境天曆中中書奏擬以為武昌推官上曰此非不要錢聶以道耶在湖廣裁減歲制萬緡經歷海南北與監司力爭平湖書院不得為老子宮又建議及入令婦為人妻孥非盛世事皆其實蹟云 人物志

龍雲從字子高永新人元末任福州儒學提舉時李一初文名為世所重而子高以詩歌與之頡頏鄉邑間詩人自吳萃樂外首推子高云 永新人物志

劉性字粹之廬陵人至順進士同知昌州改旌德縣尹有指枯木類人形者為佛民間相聚拜禮性命與至庭曰柴也命焚之後調鎮江未行召修宋遼金三史夫戊卒 林志

胡希仁字時中吉水人授古田令有林晉者 金數百兩于薦剡希仁却之不受平章燕支不花聞之曰子何減於楊震 同上

楊升雲字雲衢泰和人任貴溪縣丞張真人家情寵驕恣為民患升雲繩以法張嗾當道誣謫之尋得白改判新淦扶善鋤奸不少挫捕得真盜上司縱之遂棄官去 同上

王充耘字與耕吉水人元統進士所著有書經管見四書經疑行於世 人物志

李恕字省中廬陵人所著有易書詩孟子傍註諸書同上

吳思尹字莘樂永新人登進士授永豐縣丞既去民歌思之

元季棄官歸徜徉山水間賦詩自樂後進多師之稱桂岡

先生子孟勤仲謹能世其家永新人物志

蕭文孫字煥有吉安人年十三喪父服除遊京師上救荒策於御史臺或欲引是以薦乃憮然曰吾豈以救荒書媒仕進哉以集賢學士王德淵薦起為桃源州儒學教授遷臨江路總管府提控案牘新淦民李殺人驗者受賕蓋以疾乃移書摘其伏請改讞上下囊橐不省適監察御史行部至文孫白之受賕者始自首屬他官剖棺察之見其肋斷者四李伏罪罷官六人吏七人同列惡之在官十八月而去遷廣東道宣慰司都元帥府照磨會權臣枋國不用漢

人為幕長令下即行久之調武岡新寧尹郡民唐訟仇家擅殺家奴毛棄之江屬他尸自上流漂至察其無殺傷痕不驗密令人生得毛於永州之境乃抵唐罪莫不駭服以為神綏寧尹頓使酒殺人郡檄新寧按之有以郡官意風使全其人奮然曰若然則初覆驗官俱當抵罪活一凶如死者何吾不忍為也即推驗其獄省憲考為湖南最嘗作忠孝二史經筵檢討危素言於朝以其書可備勸講會修宋史行省上其書史官稱為纂述有體未及擢用而卒弟孚有以能詩聞揭傒斯序其集說學齋集

按蕭文孫可稱循吏而元史無傳林志豫章書不載白志采危太朴文補入

蕭泰登字則平泰和人廣東提刑僉事獠賊逼城眾惶懼失

措泰登急上馬督捕獠遂遁去時安南久失藩臣禮奉詔往諭疑懼相半泰登喻以來意歸所盜地二百里奉表貢獻陞廣西廉訪使陳便宜二十五事進南臺監察御史復言十事分按江浙卒於驛 人物志

鳳山集 林志

歐陽弇字介仲廬陵人飭行修禮不專為科舉之學所著有賀仲善永新人出宦族遊龍麟洲劉水窗兩先生之門因以舊宅建吉安詩人堂 永新人物志

王子讓廬陵人工文章而主之以仁義激之以忠憤不為詭說異詞其宗人名嘉言者亦以詩聞於時稱一時之豪 林志

解子玉字成我年十三理家事如成人居喪無闕禮肆力於

古學虞文靖公歸自翰林或勸挾所業往見可借助聲名不從齋居玩心人莫窺其際來學者亦弗拒教授桐江之上垂三十年中更亂離與人言惓惓忠義多所變化人比之王烈王通云 春雨堂集

李天箎吉水人得劉靜修道學之傳有詩書經疏行世 人物志

高文鼎吉水人叅廣東元帥府事薩都剡薦於朝授廣州同知尋陞副元帥至正間三山寇攻廣城文鼎以義激將士死守力拒幾一年援兵不至城陷遂自刎一家皆死 吉州正氣錄

劉元謨吉水人為弋陽知州至正間賊兵逼州元謨力拒凡十九日眾欲降元謨大罵曰雖死當殺此賊援兵不至城

江西通志 卷七十六
陷罵賊而死

同上

周冕字時中廬陵人由文學宰廉山賀州洞寇周滿反兵不克曰除是周縣尹來即降冕往寇望見即羅拜後家食至正末兵起監郡納速兒丁起冕及前松江同知劉福領兵次龍湖寇至衆曰姑少退冕曰當死戰遂與福俱遇害

同上

賀仲英永新人三元末糾其族保捍閭里湖南洞獠來攻邑城仲英斬其二入賊復合他寇來逼境賈勇陷陣死於邑之閭溪從子禮安追賊得其骸以歸

永新人物志

楊介字公望景行子以蔭補清江縣簿會朝廷更造交鈔徵賈料墨於江西時監州達理馬識禮募兵保障辟介率兵民戍玉山介嚴約束以身先之寇不敢犯未幾陳友諒兵

至下令錄寓官以備用介言於衆曰苟有見汙辦一罵速死耳遁迹山中鬱憤而死

人物志

曾貫字傳道泰和人紹興照磨監州辟禦龍泉寇戰於觀背死之所著有周易變通四書類辯庸學標著行於世

林志

蕭生字彞翁吉水人幼孤事母以孝聞用御史薦為建昌州儒學正寇亂家居江西叅政金子仁率師平袁州辟彞翁為叅謀會偽漢陷廬陵子仁遁去彞翁歎曰有城不守非忠也遇敵弗戰非勇也謀人軍而不死何面見天下士乎即日投學中井不死爭出之三日不食為書付女夫羅岳并書衣帶曰男子之貞猶女之烈一有玷焉萬善難雪竟赴井死郡人葬於讀書堂學之士友私謚貞節

白志

王延字與齡廬陵人沂公曾七世孫生平有逸趣自比葛天

氏之民卜居豫章東湖上荷鍤經營析九區取嘉蔬藝之
欣然自得識者咸以為知道 宋濂翰苑別集

趙應祥廬陵人年十四其父行賈不還從父從北來知父已
死即辭母往求聞都下有曾老者與父善走數千里詢之
知父殞濱州墓塚累累不可辨應祥行哭七日解髮繫馬
鞍祝曰隨馬所之過吾父墳者當髮解鞍隨既經一墳髮
解鞍隨發之棺上具有父姓名遂脫衣裹其骨以歸 元史
續弘簡錄

按趙應祥前志不載今采邵吳遠元史類編補

蕭同善萬安人任安慶路經歷元末奉邵辟攝本縣事龍泉
彭時中寇縣治同善與其尉荆世傑集義士守禦後復來
攻城陷同善督衆力戰被執賊脅其跪同善罵曰我命官

也何為跪汝賊乃裂其喉而死 林志

陳新泰和人新淦州判既歸省監州達正道聞其賢辟守州
之東境時援少食盡堅守不去未幾被執抗節死之 人物志

劉福郭太俱吉水人福仕松江路同知太為巡檢元末寇起
福以奉議統兵為宣慰周冕援拒杭州白珩巡檢郭太設
伏東向寇分隊出烏江河源冕軍翼擊之太乘勝追擊獲
其渠帥斬首數百級日曛寇尾襲冕軍太又斃其先鋒福
奮勇擊殺矢盡失援俱死之 林志

劉霖字雲章安福人幼從虞集學登進士無仕進意有太極
圖解動靜元渾歲會數原諸篇深有理致 同上

按劉雲章當有集而無傳傳者惟蘭陵烈婦碑文一篇

周霆震字亨遠安福人以先世居石門田西故又號石田子
科舉行再試不利杜門授經專意古文辭尤爲桂隱申齋
二劉所賞識晚遭至正之亂東西奔走詩多哀愁之音洪
武初卒門人私謚清節先生廬陵晏璧輯其遺藁曰石初
集張瑩爲之序 元詩小序

楊允字字和吉吉水人所著有灤京雜詠一百首邑人羅大
已序之曰楊君以布衣襪被歲走萬里窮西北之勝凡山
川物產典章風俗無不以詠歌紀之 同上

龍光庭吉水人來安縣主簿當淮南有警饋餉不乏兵部尚
書黃昭招撫江西以光庭參謀軍事首倡義士黃子淵蕭
景忠率衆擒賊首李彬一吉安遂平 林志

李復登安福人至順進士爲江華尉修治學校立濂溪祠取

經史以化導之邑遂稱治

同上

唐術字景行永豐人博通經史刻志勵行從吳文正公遊深
相契合至正庚寅中乙榜授宜春學諭元季兵亂術仗義
率衆以圖保障執於賊大罵不屈遂遇害 羅一峯集

羅景莊萬安人應武舉爲參軍兵馬使元裕追寇黃梅
大捷改招討使隸都統鄭畋元戎下 彭平進都頭行
營驍騎將軍吉虔二州有警遂授教 林志

劉楚蘭字芳叟泰和人父繩武宋亡隱居 學學者稱琴軒
先生楚蘭其長子也至元初舉茂材授建昌文學陞吉水
教諭以親老辭祿歸養益肆力於學尤深於易壘土結茅
名玩易齋其後攝鄉校凡親承議論者悉有弘益世稱深
林先生 海桑集

郭鈺字彥章吉水人生當元季盛氣負奇明初以茂材徵不就所著名靜思集嘉靖間八世孫廷昭哀而刻之經歷艱難流離之狀皆目見之可裨野史

羅文恭集

陳植字中吉永豐人至順進士授翰林待制謫廣東博羅令歸建中山書院博覽載籍尤精春秋所注名玉鎖匙明永樂間纂修五經學士金幼孜徵植所注纂入大全

人物志

周鼎字仲恒其先自安成徙廬陵至鼎益自奮勵以塲屋之業不足爲去從湜溪郭氏游湜溪名正表得靜春劉氏之傳實考亭之學也因與聞伊洛微旨四方執經者踵至年踰四十出遊江漢禮聘交贊皆辭不受時天下承平鼎獨言大勢日趨於亂遂著濟時十二策及戰守之書數千言其後汝穎兵動江南受禍最酷一一如其言性嗜古文一洗宋季刻削纖弱之弊六經皆有論著未及完獨詩經辨正若干卷藏於家詩文曰貞一藁其孟子管子商鞅諸論爲最偉云子愷字子諒洪武初進士

宋學士集

劉照更名永武字明道安福人常客游元都時方溺於承平權幸縱橫照私謁所親曰觀天時人事不久亂作矣即束裝還以薦爲分宜縣尹母老辭不赴至正壬辰秋鄉人多挈家避匿照獨奮然傾貲召募壯勇數千人連營江上未幾羣寇併力來攻百計禦之郡城以安監司奏爲吉水州判以功陞知州江西行中書省距吉安上下五百餘里惟照是倚孤軍血戰屢建奇功事聞擢吉安路總管僞漢陳友諒遣其將熊天瑞盛兵來寇與之力戰幾獲天瑞乙巳明太祖兵下吉按照終不屈已而病卒

春雨集

李廉字行簡至正進士仕贛州路信豐縣令元季兵亂洞獠時出剽掠廉立伍保相守境以寧紅巾賊奄至以死守衆潰遇害其子敬嗣父官亦力戰死邑人爲立雙節祠豫章書

按李廉安福人死事本末詳見劉三五正氣錄及羅子應隨錄中其所著有春秋會通楊東里題其後云明修元史時行簡相知無在朝者故不得列諸史傳世之知者少其於春秋不徒能明之蓋焯然有光科目也原跋

郭彥章吉水人與劉桂隱劉申齋講學有詩名其題廬陵義士絕句云淮海風回吹血腥青原不改舊時名中朝將帥論功賞不及江南一白丁爲時傳誦府志

郭煥章吉水人以明經任隆興路儒學訓導至正間兵起州縣俱降煥章激烈自奮以石繫腰沈水而死門人私謚曰

文貞吉州正氣錄

羅明遠名輝以字行廬陵人性倜儻聞寇將入境以義倡衆爲戰守備至正間吉安失守明遠率敢死士四百人巷戰城東殺寇數千明遠亦死焉郡立廟祀之吉安義士死寇者自明遠始林志

楊本巖廬陵人元季爲白鹿書院山長遷廬陵主簿往捕東固寇盜乘勢深入死之子節聞父死與其徒鄒勝同赴敵死焉義士謝願賢入寇境收三人尸以歸吉州正氣錄

段所字原中永新人性峭直善詩隱居山中日吟咏自適人稱舫軒先生所著有鷺股集龍心源序之謂可追李長吉云永新人物志

陳無吝永豐人屢以尚書應舉不偶值元末兵亂叛賊強之從無吝答曰相從可矣乞與我紙筆乃大書一詩賊怒去其舌含糊罵不絕口而死吉州正氣錄

周元定吉水人以父蔭補官至婺州路通判元季紅巾寇起糾眾拒之力戰死林志

曾止善永豐人由儒士任石城尹紅巾盜起止善率兵拒敵被執窘辱備至不屈死之贛志

康震字宗武泰和人嘗從吳草廬劉申齋學湖廣左丞吳當薦為慶陽州書院山長秩滿當遷以親老歸作莊山書院

招延學者館教之元季監州與定議為守備計城得完未幾熊天瑞入寇匿山中不食而死有思治集藏於家林志

彭文遠繼炎孫至正間徐壽輝破袁瑞臨江攻吉安行省命

萬戶張祥守龍泉辟文遠為護民巡檢寇逼城張夜遁文遠留之不可因與偕行至螺灘追騎及之被擒其從弟大遠奪賊馬奔還請兵會風雨大作亦為賊所擒與文遠及舉家十九人同日死同上

鄧椿吉水人為臨江府吏偽漢陷臨江椿集義士偕萬夫長楊璫等與敵大戰城下三日兵潰投江死同上

張心禹吉水人元末盜起趙州知州劉震奉郡檄禦之震命其子孟初同心禹率眾直搗其穴乘勝深入伏發孟初全軍陷沒心禹顧其子晉民曰父子同以義死復何憾亦俱死之同上

鄺作成廬陵人安成巨寇將迫境作成獨以義激保障者境

賴以全獻俘於監郡納速丁兒監郡喜曰得義士如鄺君

數輩吾何憂紅巾哉 同上

劉明道吉水人元末紅巾四起明道揭白巾為號與賊百戰不靡行省移文褒之曰堂堂巨鎮不戰而降小小灘頭乃能仗義灘頭明道里也 同上

劉雯字漢章安福人會淮賊據安成雯起兵復州治至冬假行軍鎮撫出兵援分宜官軍戰敗悉逃雯單騎冒陣死 府志

劉宗權廬陵人紅巾亂郡察知宗權有義檄守永福膏澤等鄉賊畏後躡不敢越境以暴廬陵逼郡城賴保障者五年賊甚患之逮移壘玉城有鄉人引賊據山麓泉令不得汲及計窮宗權率眾出壘力戰敗賊穴箕加宗權頭火之子朋遠從子如初俱以抗言死如初妻彭以不辱死劉晴川

魁題其死義傳後曰不知時有地方之責者果皆終不死

耶視宗權父子如初夫婦何如也 吉川正氣錄

章善字立賢龍泉人性耿介尚氣急義讀書至古忠義士輒撫卷太息至正壬辰東南盜起龍泉居萬山間又聯絡郴潭贛庾之境不逞煽妖尤甚善憂之奉其親入城為自保計有完者帖穆需次家居省府署攝縣事善往見為陳說古忠義事完者帖穆亦自以世受國恩又先人墳墓所在誓死守不去明年春寇攻圍益感城中糧盡且數月猶拒守不下一日山水暴至完者帖穆挈妻孥乘小舸宵遁城遂陷善舉室嘗自誓脫有急必死不苟活也至是善之父士壁年八十餘矣先自投北江其妻李氏與其子婦亦相挽赴井以死善聞之即與其子煥臨江水訣曰汝年小宜

急去為宗祀計勿我顧言已輒自赴煥號呼不能止亦繼投之煥衣裙猶漂浮波間未遂沒會甘竹人以筏來救之免焉初善從前進士吳浩授禮經去塲屋為古文詩歌以自見揭文安公謂其辭春容爾雅一洗近代之陋嘗於所居營釣舫齋因自號楚江釣者學者稱之為楚江先生云

劉職方集

按章善林志豫章書人物志俱不載白志采劉崧所撰楚江先生傳增入

楊天與字與可泰和人族蕃且富天與兄弟俱文而貧頎然長身幅巾衣履非弔喪問疾不出門日取書懷袖間吟誦而樂之無飢寒之色性嗜酒不能常得歲授徒里中諸生多為致之每旦坐堂上諸生執業以次進善為講說旨義

各得其所通者精易卜時為人決出處得失進退如響而不為機祥變怪之說其義止於玩爻審象而已為詩文率口占以授意到或自書之口無滯詞筆不停綴然不喜著藁故多不傳年六十三以疾終

同上

彭寶林廬陵人慷慨雄傑元季集鄉兵破走蘄寇復吉安城功第一授水軍萬戶父源竭家貲給餉將兵勤王日費千金未嘗吝惜壬寅寶林知事不可為取所授虎符北面再拜焚之號慟欲自盡念其父九十餘未忍絕而復蘇杜門不出子志道代父領其眾內附從常遇春下贛與朱文正守江西有功不言賞亦自免歸

解學士彭氏族譜序

劉中孚字志行吉水人舉茂異至正間任南雄推官用刑平恕囹圄常空部校與富民徐氏有隙誣以反逆繫獄三十

人中孚錄囚得其情平反之湖寇圍城十餘日散帑金率子弟及部民守北門寇不得逞比再至勢益張長官欲降中孚曰吾頭可斷不可降也卒莫能強後知英德州以完城功擢肇慶總管辭不就 廣東名宦志

湯德明永新人五歲喪父元末偽相周安據永新明兵下邑德明同母劉氏隨軍入袁州指揮韋富家富調守遼東德明從行遂失母所在旦夕號慟籲禱富憐之乃資遣俾還袁州袁人無識者歸永新問之母依親調鳳陽比至所親又調護衛北平乃復徒步追求之竟得焉母子不相見三十年德明迄全其養劉年八十五乃卒 安志

按湯德明前志不載今采補同時尚有永豐鍾慶宗泰和楊美曾源友鄧學詩吉水錢尚德胡榮祖安福劉豐

樂俱以孝義見安志今附姓名于此

江西通志卷第七十六